

ASO LULU, 6 MATI 2024

Na nofoia e le Fofoga Fetalai le Nofoa i le itula e 9:36 i le taeao.

Tatalo.

FOFOGA FETALAI: Ou te faasilasila atu ua amatalia nei Taualumaga a le Fono Aoao Faitulafono.

Ou te faatalofa atu i lenei taeao fou i le paia o le Palemene, i le afio o lau Afioga i le Tamaitai Palemia, afio lau Afioga i le Sui Palemia, afio foi a outou Afioga i Minisita o le Kapeneta, tainane a outou Afioga i Minisita Lagolago.

I lea talaga na atoa, i le afio o lau Afioga i le Taitai o le Itu Agai, lau Afioga i le Sui Taitai ma sui usufono mamalu uma o le Palemene. Viia le Atua i Lona alofa ua mafai ona tatou toe fesilafai i luma o nuu ae le o puapuaga. Malo le soifua manuia ma le lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo. Malo le usu i lenei taeao.

Mo le silafia e le Palemene ma le tatou Maota, ua nofoia nei le Nofoa mo Tagata Lautele e sui auai o le Polokalame Faapalemene mo Aoga Tulaga Lua 2024. O Polokalame Faaauau nei a le Palemene o lo o taimua ai le Ofisa o le Failautusi mo le faailoaina atu o nafa ma matafaioi autu a le Palemene, o ona sui usufono ma Komiti Faapalemene.

O le Polokalame ua faatulaga mo le aso ua faapitoa lea mo alo ma fanau ua filifilia mai Aoga Tulaga Lua e tulata mai i le taulaga. O se taimi o le tatou malologa o le a maua ai foi avanoa e feiloai atu ai nai alo ma fanau i lau Afioga i le Tamaitai Palemia faapea foi lau Afioga i le Taitai o le Itu Agai.

E fai ai lou leo ma Sui o le Palemene e faatulima ma faafeiloai atu ai i Susuga i Faaoga aemaise o alo ma fanau o laumua eseese ua tatou mafuta i lenei taeao. O le tatalo, ia faamanuia le Atua ia te outou le fanau a o feagai ai ma aoaoga. Ia i ai foi Lona agalelei i la outou Polokalame ua faatulaga mo lenei aso. Malo faafetai.

TUUIINA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2023/2024 Nu.143, Tali a le Malo i le P.P.2023/2024 Nu.60, Lipoti a le Komiti o le Vaega o Atinae Eseese i le P.P.2023/2024 Nu.14, Lipoti Faaletausaga a le Faalapotopotoga o Vaa a Samoa mo le Tausaga Faaletupe 2021/2022.

2. P.P.2023/2024 Nu.144, Lipoti Faaletausaga a le Faalapotopotoga o Tau mo Faalavelave Faafuasei mo le Tausaga Faaletupe 2021/2022.
3. P.P.2023/2024 Nu.145, Lipoti Faaletausaga a le Faaputugatupe o Faamanuiaga mo Tagatanuu Matutua o Samoa mo le Tausaga Faaletupe 2022/2023.
4. P.P.2023/2024 Nu.146, Lipoti Faaletausaga a le Pulega o Felauaiga i le Laueleele mo le Tausaga Faaletupe 2022/2023.

Ma le faaaloalo lau Afioga.

TUUNA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2023/2024 Nu.134, Lipoti a le Komiti o le Vaega Tau le Tamaoaiga i le P.P.2023/2024 Nu.41, Lipoti Faaletausaga a le Matagaluega o Tiute ma Tupe Maua mo le Tausaga Faaletupe 2021/2022.
2. P.P.2023/2024 Nu.135, Lipoti a le Komiti o le Vaega Tau le Tamaoaiga i le P.P.2023/2024 Nu.69, Lipoti Faaletausaga a le Faalapotopotoga o Esetete Tausi a Samoa mo le Tausaga Faaletupe 2020/2021.
3. P.P.2023/2024 Nu.136, Lipoti a le Komiti o le Vaega Tau le Va Fealoai i le P.P.2023/2024 Nu.94, Lipoti Faaletausaga a le Pulega o Tineimu ma Faalavelave tutupu Faafuasei mo le Tausaga Faaletupe 2022/2023.
4. P.P.2023/2024 Nu.137, Lipoti a le Komiti o le Vaega Tau le Va Fealoai i le P.P.2023/2024 Nu.67, Lipoti Faaletausaga a le Iunivesite Aoao o Samoa mo le Tausaga Faaletupe 2022/2023.
5. P.P.2023/2024 Nu.138, Lipoti a le Komiti o le Vaega Tau le Va Fealoai i le P.P.2023/2024 Nu.81, Lipoti Faaletausaga a le Matagaluega o Tina ma Tamaitai, Atinae o Nuu ma Afioga ma Agafesootai mo le Tausaga Faaletupe 2022/2023.
6. P.P.2023/2024 Nu.139, Lipoti a le Komiti o le Vaega Tau le Va Fealoai i le S.R.2024/1, Tulafono o Teuteuga o le Tulafono o Tau mo Faalavelave Faafuasei – Faasilasilaga o le Amata Faamamaluina.
7. P.P.2023/2024 Nu.140, Lipoti a le Komiti o le Vaega Tau le Va Fealoai i le P.P.2023/2024 Nu.82, Lipoti Faaletausaga a le Matagaluega o Aoga, Taaloga ma Aganuu mo le Tausaga Faaletupe 2022/2023.
8. P.P.2023/2024 Nu.141, Lipoti a le Komiti o le Vaega Tau le Va Fealoai i le P.P.2023/2024 Nu.68, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2022/2023.
9. P.P.2023/2024 Nu.142, Lipoti a le Komiti o le Vaega Tau le Tamaoaiga i le P.P.2023/2024 Nu.103, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2022/2023.
10. P.P.2023/2024 Nu.147, Lipoti a le Komiti o Tupe Maua ma Tupe Totogi i le P.P.2023/2024 Nu.43, Lipoti Faaletausaga a le Matagaluega o Tupe mo le Tausaga Faaletupe 2020/2021.

11. P.P.2023/2024 Nu.148, Lipoti a le Komiti o Tupe Maua ma Tupe Totogi i le P.P.2023/2024 Nu.70, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2020/2021.
12. P.P.2023/2024 Nu.149, Lipoti a le Komiti o Tupe Maua ma Tupe Totogi i le P.P.2023/2024 Nu.72, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe 2022/2023.
13. P.P.2023/2024 Nu.150, Lipoti a le Komiti o Tupe Maua ma Tupe Totogi i le P.P.2023/2024 Nu.104, Lipoti Faaletausaga a le Falemeli o Samoa mo le Tausaga Faaletupe 2022/2023.
14. P.P.2023/2024 Nu.151, Lipoti a le Komiti o Tupe Maua ma Tupe Totogi i le P.P.2023/2024 Nu.114, Lipoti Faaletausaga a le Faletupe o Atiina A'e o Samoa mo le Tausaga Faaletupe 2022/2023.

Ma le faaaloalo lau Afioga.

**TULAFONO TAU FAAOFI O TEUTEUGA O LE TULAFONO O
FAIGA PALOTA 2024 – faitauga faalua - felafolafoaiga faaauau
– aso fono lona 2**

FOFOGA FETALAI: E tolopo tualumaga a le Fono Aoao i le aso fono ananafi ua maea ona saunoa le sui usufono mamalu mo Falelatai ma Samatau.

Ia o le avanoa lenei mo se tasi o sui usufono mamalu e fia saunoa i le tatou Tulafono Tau Faaofi.

Ia ua maitau atu o lea ua tulai mai le Igoamatua lau Fetalaiga Ale, Faleata 4.

Tofa ALE VENA ALE (Faleata 4): Faafetai i lau Afioga i le Fofoga Fetalai. O lea ua i luma o le Atua le viiga ma le faaneetaga ma tatou tatalo pei ona saunia e lau Afioga i lenei taeao. Ma e ou te talitonu ua i ai faatasi le paia ma le maualuga o lenei Palemene i luma o le Atua i le tatou talosaga ua e siitia.

Ou te ofo alofa atu ma faatalofa atu i lau Afioga i le Fofoga Fetalai i lenei taeao, lau Afioga i le Sui Fofoga Fetalai ae faapea foi le afio o lau Afioga i le Tamaitai Palemia, le Afioga i le Sui Palemia faapea foi Minisita o le Kapeneta ma Afioga i Minisita Lagolago.

Ia, le afio o lau Afioga i le Taitai o le Itu Agai faapea foi le Afioga i le Sui Taitai ma sui usufono mamalu uma o le Palemene i lenei taeao.

E faafeiloai atu foi i le maualuga o Ofisa Sili o Pulega o Matagaluega a le tatou Malo ua tatou faatasi i lenei taeao, aemaise alo ma fanau o le tatou atunuu i le polokalame ua faataoto e le Ofisa o le Fono Aoao Faitulafono, le Failautusi aua foi le lumanai o alo ma fanau i aoaoga aemaise o le lumanai manuia aua upufai o le tatou Malo.

Ia, ou te faatulou atu foi i le paia faale-Malo aua le afio o lau Afioga i Le Ao Mamalu o le Malo e faapea foi le Sui o le Fono a Sui Tofia, lau Afioga i le Faamasino Sili faapea foi le Peresetene o le Faamasinoga o Fanua ma Suafa, Ofisa o Faamasinoga. E faapea foi Matagaluega uma a le tatou Malo,

Faalapotopotoga Tumaoti ma le aufaipisinisi o lo o tautuaina le tatou atunuu i so o se tafa. Ia malo le soifua manuia i lenei taeao.

Ae a le tapuaiga i le paia o Aiga ma latou Tama, o Tama foi ma o latou Aiga aua le Usoga ia Tumua ma Pule, Ituau aua oe Faleata ma lou fale na ato i ata, mamalu maualuga aua Aiga i le Tai ma le Vaa o Fonoti.

Ia, le paia i le tapuaiga a le Faigamalo a Tutuila ma Manua, le afio o le Kovana faapea foi le Kovana Sili, le Lutena Kovana ma le Faigamalo a Tutuila ma Manua. Ia, o le paia lava lea aua le afio o Sua ma le Vaifanua, Fofu ma Aitulagi, o Saole ma Saleaamua ma le Launiu na Saelua. E faapea foi Faatui ma le Auvaa o Tootoo, le paia i le Manuatele, o le atoaga lena o le tatou atunuu e amata mai le Taisamasama o le Tuimanua seia paia Fili ma Puletuu na tauilo i ai le Malo o Nafanua. Tulou, tulou, tulouna ia lenei taeao matagofie i le alofa o le Atua.

Ae le faagaloina ai le paia i auauna a le Atua i faafeagaiga taulagi o lo o faafaletulua ma faafalelemalu i nuu ma afioaga aemaise Ekalesia Kerisiano uma o le tatou atunuu o lo o tapuia faiva o le tatou Palemene, a o faagasolo Tualumaga o le tatou fonotaga i lenei taeao.

Ae ua ou tulai atu ma le faaaloalo tele lau Afioga i le Fofoga Fetalai e fia faaalua se manatu o le itumalo o Faleata 4 e tusa ai o le Tulafono ua taoto nei i le Palemene. Ia ma i le faafogafoga mai a Oe le sui usufono lea o Vaimauga lea faatoa fai le lauga a Faleata, [.....] i le tala a Faleata i lana lauga i le Tulafono lea. A o lou tulai mai le aso ananafi ma e saunoa mai ua ou tete'e i le Tulafono. O anafea na ou tete'e ai i le Tulafono? O le Maota lenei e faaalua ai lou finagalo. O le Pre-sitting a tatou lea na fai o le auala lena e faataoto mai ai e le Matagaluega ma le Minisita ina ia aumai ai o tatou manatu e fofou ai lou sa aua la le taeao lenei i totonu o le Palemene. [.....] i le tala a Faleata lea o le a fai atu i le Tulafono lea.

FOFOGA FETALAI: Malie lau Afioga leaga o lea ua e ta'ua le sui usufono mamalu, e i ai foi le ava tele e faapena lava le tatou nonofo ai, leaga o lea ua tulai mai...

Ia se i tulai mai. O oe foi o se tasi o sui usufono matua o le Maota.

Afioga Sulamanaia Fetaiai Tautilili Tuivasa (Vaimauga 1): Lau Afioga i le Fofoga Fetalai o lenei vaitaimi o le fagafulu o le vaitaimi o le talia o faaosoosoga. O le Vaimauga e le te'i, ae ona o lea e faalogologo alo ma fanau e omai i le Vaimauga, o saunoaga foi a Faleata, ae tele a taimi e tautala ai le Vaimauga o Faleata ma Vaimauga o le uso. Ia aemaise foi o eleele nei e pule ai le Vaimauga. Ae o le saunoga a le Igoamatua, faafetai o lena ua tau le mea na e manao ai, na ua e alaala mai i ina i lou tamaoaiga na e oo mai ai i totonu o le Palemene e fia maua sau taavale ma fia maua le tamaoaiga. O lena ua e alaala mai i ina, ua sui foi le faalogo a le Vaimauga ia te oe. E pei ona ou fai atu e tutusa le Vaimauga ma Faleata, o le uso, ia o lena la ua e... Talofa e, talofa e, o lena ua tau lau o le faamoemoe.

Lau Afioga ou te manao e aveese le saunoaga ia, “Faalogo lelei ou taliga”, e le ava ma le migao i totonu o le Palemene. E pei o le mea lena e tatalo atu ai lenei sui usufono e ava tele i le Maota lenei a o le Tama foi ia o se tagata e i ai upu a le atunuu. Ae faamolemole aveese ia saunoaga e le logomalie aemaise lea e faalogologo le lumanai o le Vaimauga 1 e agai mai i totonu o lo o i ai lava faamaumauga ia. O lena ua tau le mea na e manao ai, o lena ua e i ina. Ia o le a la le isi mea? O le a la le isi mea, a o lena e te... leaga o lea ua sui lau talanoa ua e oo mai i i, ae a aumai faamaumauga lea na i ai, tete’e. O le a la le mea ua toe sui ai? O le a le mea ua toe sui ai? O lea e faalogologo le Ofisa.

Tofa ALE VENA ALE: Lau Afioga i le Fofoga Fetalai o le mea e fia faamalamalama ma fia faamanino i le saunoaga a le sui usufono lea...

Afioga Sulamanaia Fetaiai Tauiliili Tuivasa: O le Pre-sitting na o tatou, o lea la ua sui lau saunoaga leaga o la e faalogologo lou Itumalo.

FOFOGA FETALAI: Ou te faamalulu atu i sui usufono ia e tulai mai.

Tofa ALE VENA ALE: O i i le Maota lenei o le Palemene e faaalua ai sou finagalo i le Tulafono...

FOFOGA FETALAI: Ia malie lou finagalo...

Tofa ALE VENA ALE: O le Pre-sitting...

FOFOGA FETALAI: Ia malie mai le sui usufono o Faleata 4, ia e leai o outou o Taitai matutua e faalagolago i ai le Nofoa ma le Palemene. E i ai foi le manatu ia avea foi tatou ma faataitaiga lelei o lea e afifio ia alo ma fanau o le atunuu e molimauina le tatou Maota.

O le mea lea ua iai le manatu ia maua pea e tatou le feavata’i ia tatou saunoaga ma tuleiga aua lava le toamalie o le tatou galuega ma le tatou Maota.

O le mea lea, o le fautuaga foi lea ua aveatu e le Nofoa, ia tautuana. O le mea lea o lea ua faatonu le Failautusi e aveese le saunoaga foi... i lena foi saunoaga ua saunoa ai le Igoamatua. O lea ua faatonu le Failautusi e aveese.

Tulai mai lau Afioga i le Igoamatua, tautuana ma oe leaga e le tele se tatou taimi.

Upu na faatonuina e le Fofoga Fetalai e aveese mai Faamaumauga o le Saunoaga a le sui usufono mo Faleata 4: “[Faalogo lelei ou taliga].”

Tofa ALE VENA ALE: Faafetai i lau Afioga i le Fofoga Fetalai. Ua ou malie foi e aveese le faamatalaga lea na ou... i le taeao nei. Ae le mafai na alulua le mataupu lea ae leai se tala a au nei e faia i le mataupu lea, e tele a o taimi e saunoa ai le sui usufono o Vaimauga, o Faleata ma le Vaimauga, a o le mataupu

lea na agiga ananafi ia pei o le faanoanoaga tele lena. O nei i le taeao lea la faatoa faalia ai se manatu o Faleata i le Tulafono, pei o le agaga moni lena o le Mataupu. A o tatou Pre-sitting e le o ni mea e... o mea na e faufau ai se manatu ma se finagalo o le sui usufono e sau e aumai i le fonu lenei. O mea foi na ou tautala i ai i le tatou Pre-sitting ona o mataupu e fia malamalama ai, a lea ua ou matua malamalama lava i le Tulafono. O lea la i le taeao nei, ia leai o le tala lena, ae... Sula ia...

Lau Afioga i le Fofoga Fetalai...

Afioga Sulamanaia Fetaiai Tauilili Tuivasa: I le ava tele faauma mai le igoa, e i ai le mea i tua, Sulamanaia, e i ai le mea i tua. Ae o le lagona lau Afioga i le Fofoga Fetalai i le tatou Tulafono, o le Pre-sitting ua aloaia pei o le mea lena e tataua ona... Ua aloaia le Pre-sitting i tatou Tulafono Tumau, pei o le agaga lena, e le faapea e ese le mea e faaali i o i le Pre-sitting ese le mea e aumai inei. E pei o le agaga lena e fesoasoani atu ai i le finagalo. Ae ua maua le loto faamagalo i le vaitaimi o le fagafulu o le vaitaimi o le talia o puapuga o le Atua leaga o oe o le Taitaifono o lau ekalesia. Ae faafetai ua ou vaai ananafi i le aulelei o le taavale a le uso, fia maua se taimi e fia tietie ai le sui usufono o Vaimauga i le abuse ina o na meatotino a le Malo ua avatu i ou aao.

Manuia le fonu lau Afioga i le Fofoga Fetalai.

Tofa ALE VENA ALE: Se i e silasila la lau Afioga i le Fofoga Fetalai i ituaiga lafoga faapenei.

FOFOGA FETALAI: O le a alu maimau lou taimi Igoamatua aua e te amanaia fua ia upu o le...

Tofa ALE VENA ALE: O le a ou talia le fautuaga a lau Afioga i le Fofoga Fetalai, e saolelei a mo le pola motu i tua, maimau fua le taimi e fai atu ai se tala i mataupu ia. Ae ou te le sau i inei ona o le itu lena, na ou sau i inei o le finagalo o lou itumalo ma le mea e tataua ona ou sau i ai. O le faamalamalama lena ma le pisa soo o outou i mataupu ia ia te au.

Ia, lau Afioga i le Fofoga Fetalai... Lau Afioga i le Minisita e ou le Tulafono ia malo faafetai. Faafetai mo le Tulafono ma e matua lagolagoina e le Itumalo lenei o Faleata 4 le Tulafono. Le tatou Itumalo a outou faafogafoga mai o le taimi lava e pasia ai le Tulafono, ia tatou taliaina le Tulafono aua ne i faatalitali e o atu le Ofisa, ae o a tatou e resitala ma faafou. Ua sao foi le finagalo o le Tulafono. A silasila foi i ai i ata o tatou nei, ia o le ata o au la e i ai ua 30 tausaga, o lou matua talavou lava. A o le taimi lenei ua tau le iloa e le Ofisa Fai Palota po o au moni lea pe leai. O lea la ua alagata ai le suiga o le Tulafono pau le mea, ia tatou talia.

E pau lau fautuaga lau Afioga i le Minisita ma le Ofisa o le Komesina o Faiga Palota, ia lava le o atu i tua o le aufaigaluega a le tatou Malo ina ia uunai le omai o Itumalo e toe tapue o latou ata ma fai fingerprints. Ae ou te fautuaina foi le... aua o lena e mafai lava ona download mai information uma, lou suafa ma lou asofanau ma tulaga uma lava na. A o le taimi lea e toe omai ai e toe pue

lou ata ma fai au fingerprints, ia pei o le galuega lea... E le tele se galuega a matou faipule pei ona saunoa foi i ai nisi o sui usufono pei o le a tigaina a tatou nei sui usufono e o e lau mai tagata ona e tau le mafai e tatou tagata ona omai e resitala e oo foi i le Palota. Ua tatou malamalama uma lava i ai i tulaga foi o tatou tagata palota, a le alu atu lava le faipule foi e aumai oe e te resitala ma e sau e te palota, ia pei o le tulaga lena i ai.

Ae o lau fautuaga lena lau Afioga i le Minisita ma le Ofisa o le Komesina o Faiga Palota, ia lava le taimi. Ou te manatu o lea ua fesiligia foi ae ua saunoa mai lava le Komesina o Faiga Palota, 18 masina ia Oketopa i le tausaga lea ua tataua ona mautu lelei le tulaga o le Lola Palota i le alo atu mo le Faiga Palota tele a le atunuu i le 2026. Ou te manatu foi ua talafeagai lea. Ae o le auala lea i le manatu o lenei itumalo e mafai ai ona atoatoa le toe resitalaina o le tatou aupalota, o le aufaigaluega lava. Ia tetele le agai atu i tua i itumalo ina ia mafai ona fai ai le galuega lea, e faigofie lava na o le sau a o le tagata ia pue lona ata ma fai lona fingerprint a o la ua i ai uma lava ona information. E le tataua foi ona toe i ai nisi sutesuega tetele a le ofisa ma le Komesina o Faiga Palota i le galuega tele lea. O i ina la e mafai ai ona faataunuuina le faamoemoe lea o le tatou Malo aemaise le tatou Tulafono. Ia, ma ou te mautinoa lava po o a foi le feteenaiga o manatu ma finagalo o le Palemene i lenei taeao, e mautinoa lava e pasi le Tulafono. Aua o le Tulafono ia ua faatuina atu e le tatou Malo, e tataua lava ona... e le pei o Tulafono ia na fai e le tatou itu, a fai atu le Tulafono ma le lafo a le Malo ae o le isi vaega tete'e ifo i o, uma ifo ua [.....] le Tulafono ua le pasia.

Lau Afioga i le Fofoga Fetalai, ia o le sao lena o lenei itumalo, manuia tele le Palemene i lenei taeao, faafetai.

FOFOGA FETALAI: Malo faafetai, malo mo le saunoaga o lea ua faafogafoga le Maota i le finagalo o le itumalo. E fautuaina foi a outou Afioga tautuana ane tatou saunoaga ma tatou upu i totonu o le Maota ia faapena ona tatou mataitu aua lava le mamalu ma le tauleleia o le tatou Maota. O le mea lea, e faapena se lagona.

Tulai mai lau Afioga i le Tamaitai Palemia.

Afioga Hon Fiamē Naomi Mataafa (Palemia): Lau Afioga i le Fofoga Fetalai sa faapea se i maea lelei le saunoaga a le sui usufono o Faleata lea faatoa mavae atu. Ae ou te tulai atu e talosagaina lau Afioga i le Nofoa, ia pe o se taimi talafeagai pe aumai se faaaliga a le Nofoa e tusa ma tatou Pre-sitting. O le a tonu lona tulaga? O le a le fesootaiga o lena ma Tualumaga o le tatou Fono, ona o lea ou te vaai atu o lea e felafolai ai tatou sui usufono. Ae pei e manaia le faataoto mai e lau Afioga i se taimi talafeagai, ia ona tatou savavali uma ai lava lea. Faafetai.

FOFOGA FETALAI: Malo faafetai. Faafetai i lau Afioga i le Tamaitai Palemia ua faamanatu mai le itu lea, e taua tele mo le silafia foi e le paia o le tatou Maota. Ia silafia lelei e a outou Afioga i sui usufono mamalu o le Maota, o tatou Pre-sittings ua aloaia o Tualumaga o le tatou Palemene. E taua tele

outou finagalo faaalua i taimi e fai ai a tatou Pre-sittings ia o lea foi ua aloaia i totonu o tatou Tulafono Tumau. Ae e i le sui usufono mamalu lava lona ia finagalo i le faamalamalamaina atili o lona finagalo. A o le tulaga o le aloaia, ia mo le silafia e le paia o le Maota ma outou Afioga i sui usufono mamalu o le Palemene, o le tulaga lena ua aloaia foi a tatou Pre-sittings o se vaega o Taualumaga o le tatou Palemene, mo le silafia.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, o le saunoaga a le sui usufono lea faatoa uma atu, fai mai “fumfa”. O lea e faalogologo le Maota lenei leaga o lea sa amata lava e pei e faaautu mai ia te au a o lea pei e maua atu... E tatalo atu le sui usufono o Vaimauga e aveese ma faamaumauga. O le Maota lenei e aumai ai mea mamalu. Ou te le iloa po o le a le uiga o lea... ia pei o le uiga lena e tatalo atu ai le Vaimauga e toe aveese ma ia faamaumauga. O lea foi e maitau atu i lela itu e leai a se isi o lauga, a la foi ua oo atu i o muamua lava lauga, pei e faapena se lagona.

Aveese le fumfa ma faamaumauga a le Palemene lau Afioga.

FOFOGA FETALAI: O lea ua maua atu le finagalo. Masalo foi o tau maua mai le faamatalaga a le Nofoa, ia o le ala lena o lea foi e avatu faafautuaga. Ae o le tulaga lena ua tataua ona aveese le upu lea po o le a lava le faauigaina a le sui usufono ia ae ese foi le faafofoga a le Maota ma le atunuu.

O le mea lea ia o lea ua faatonu e aveese le upu lea.

Se i toe tulai mai le sui usufono.

Upu na faatonuina e le Fofoga Fetalai e aveese mai Faamaumauga o le Saunoaga a le sui usufono mo Faleata 4: “[Fumfa].”

Tofa ALE VENA ALE: Lau Afioga i le Fofoga Fetalai ua ou talia e toe aveese, ae o le faapupulaga o le upu lea, o le matua le taliaina lava, Ioe. Means ua lapse le Lafo, pei o le uiga lena ua le taliaina, Na faatu e le Malo le lafo ae toe defeat e le Malo le lafo. E pei o le uiga lena o le upu. Ae ua lelei lau Afioga aveese ia na upu ma le faaloalo tele.

FOFOGA FETALAI: Faafetai. O aga lava ia a le tatou Maota e faapena, tatou te lagona foi lava le taua o upu tatou te saunoa i ai ia ma upu foi e tataua ona tuu ese aua le mamalu o le Palemene. O le mea lea malo faafetai mo finagalo faaalua.

Tofa Hon Tuuu Anasii Leota (Siumu): Lau Afioga i le Fofoga Fetalai...

FOFOGA FETALAI: Se i tulai mai ia.... Malie lava le sui usufono mo Lefaga ma Faleaseela leaga o lea ua tulai mai le sui usufono mo Siumu, ia ona tuu atu loa lea i lau Afioga.

Tulai mai le sui usufono mo Siumu.

Tofa Hon TUUU ANASHI LEOTA: Faafetai i lau Afioga i le Fofoga Fetalai, faamalo foi le onosai i le tau faafoefoeina o le tatou fonotaga. Ae ou te faatalofa atu i le paia maualuga o le Maota i lenei taeao i le afio o lau Afioga i le Fofoga Fetalai, afio foi lau Afioga i le Tamaitai Palemia, afio lau Afioga i le Sui Palemia ae a le mamalu i le Kapeneta, afifio foi Afioga i Minisita Lagolago.

Afio foi lau Afioga i le Taitai o le Itu e Agaia le Malo aemaise foi lau Afioga le Sui Taitai ma sui usufono mamalu uma o le Palemene.

Ou te faatalofa atu foi i le tapuaiga a Samoa e le gata i Samoa nei ae so o se vaega o le kelope o lo o faapena ona maua ai nei faasalaluga. I le afio ai o lau Afioga i Le Ao Mamalu o le Malo ma lau Masiofo, le Sui o le Fono a Sui Tofia ma lou Faletua, le afioga i le Faamasino Sili ma le mamalu i alii ma tamaitai o le Faamasinoga.

E faatalofa atu foi i le tapuaiga faifaipea a le aufaigaluega a le Atua o lo o latou tataloina pea se manuia mo si o tatou atunuu. Ia e faatalofa atu i lau Afioga le Failautusi, le Sui Failautusi ma le mamalu o le aufaigaluega a le Fono Aoao Faitulafono. Ae tainane foi le tapuaiga i Ofisa Sili o Pulega o Matagaluega ma Faalapopotoga uma a le Malo ua mafai ona tatou auai faatasi mai i lenei taeao.

Ia, a o se avanoa foi lenei ou te fia pai atu ai i si ou itumalo, le paia ia Sa Asomua ma Aiga e lua, lau Fetalai Tuuu ma lo outou Aiga o Sa Tuuu, le Falelua o Tulafale le Fofoga o Alataua, Utaileuo ma le mamalu i le Faletolu. Ae a le tapuaiga a Aiga Sa Levi o lo o faapena ona faafalelemalu i totonu o le tatou itumalo aua lava le tauasuina o le ipu o le ola aua se manuia o le tatou itumalo. Ia, malo le tapuai, malo le tatalo. Ia, ae tapuaia maia ae se i taumafai atu se sao i le Tulafono e pei ona opea nei i le Maota nei.

E faatalofa atu foi i alii ma tamaitai Faiaoga ma Pule o Aoga aemaise foi alii ma tamaitai o aoga eseese ua tatou mafuta ma auai mai i lenei taeao i le fonotaga a le Palemene.

Ia ou te fia piiama foi i le tatou faapolo ma le faasagi na e siitia i lenei taeao lau Afioga i le Fofoga Fetalai. Sa leai lava se manatu e fai se lauga i lenei Tulafono ona ua ou talitonu ua manino ma malamalama mea uma ina ua maea ai ona tatou feiloai i tatou Pre-sittings ia na taua. Peitai, ona sa taua e se tasi o sui usufono o le a ou le taua le igoa e faapea mai o au le isi sui usufono sa ou teenaina le Tulafono. Ia lea sa saunoa foi le Afioga i le Tamaitai Palemia i le faataoto maiga o nei mea o Pre-sittings. Ou te talitonu o le toe matimatiina lea o se Tulafono ae e le i oo mai i le Palemene ona o le Palemene o latou ia e faia le Tulafono. O lea e tatau ai ona faaalua ai finagalo ma manatu o sui usufono uma o le Palemene. O le mea moni lava la e le tatau ona saisaitia pe oti i tua se finagalo. O ou la manatu na folasia i le tatou fonotaga i lea taeao na tuuina atu o ni fautuaga, o ni timaiga a o se tuualalo i le Malo ina ia faatupu manatu agai i luma. Masalo pei e malosi lou leo i lea taeao na manatu ai le sui usufono o lea ou te teena le Tulafono ae leai lau Afioga. Manatua foi le sui usufono o au lea ua tofia nei e avea ma Minisita Lagolago i le Matagaluega e ou le Tulafono lea, ma e le mafai ona ou aloese ai i lou lagolago i le Tulafono aemaise foi le Afioga i le Minisita ua ou... ua ma galulue faatasi ai nei, ua ou galue ai nei. Ina ne i

galo i le sui usufono mamalu, o faiga faavae ma taiala a so o se faigamalo e pei foi o le Vaega Faaupufai sa tatou i ai, sa tatou auai, e aumai loa se Tulafono a le Malo e le toe lauga se isi, tatou te lagolago uma lava i ai, e iloa ai le tatou tutu faatasi. E pei o le agaga lena e toe faamanatu ai lenei taeao ona sa taua ai e tete, i te i foi ua faapea mai le sui usufono o le mea lea ua ou manao ai ina ia ua maua sau taavale. Ia e faamalulu atu, ia manatua lelei na ou savali ese sa ou tutoatasi. Ia na fai lea o le faaiuga matou te toe o e fai palota. Ou toe oo lea i le itumalo, fesiligia le finagalo o le itumalo. O le a le tali na aumai? Fai mai le itumalo....

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, o se mea e fia faamalamalama i le Tulafono Tumau...

FOFOGA FETALAI: O le a... Malie le sui usufono, o le a le uiga o lau faauilavea?

Afioga Sulamanaia Fetaiai Tauilili Tuivasa: Leaga o lea ua toe afea mai le sui usufono lenei sa...

FOFOGA FETALAI: E le o taua lou suafa i le...

Afioga Sulamanaia Fetaiai Tauilili Tuivasa: Leai, o au lea e faatatau ai le lauga lea. E pei o le agaga foi lea na avatu ai. Lea ua saunoa malele sao ai le Tamaitai Palemia, o le Pre-sitting e aloaia. Ae a tatou maitau foi i lenei Tulafono lau Afioga le Fofoga Fetalai ma le paia o lenei Maota, o lea e fai faanatinati. O le agaga la lena o lea sa faapea e avatu pea le matou tuualalo. A o lea e toe lauga a o laua e ana le Tulafono. Le a le mea e le musumusu ai o ia i lana ia Minisita o laua e ana le Tulafono. Alu ai le taimi, a o lea o le la Tulafono e tatau ona malamalama ia e le toe lauga ai i le Maota lenei. Leaga lea e pei e agai mai iinei, a o le Pre-sitting, lea ua toe sui le talanoa ina ua faalogologo mai le itumalo i le Maota, a o le Pre-sitting o le isi tete lea i le Tulafono lenei. E tatau ona avatu pea... A aumai faamaumaga ia na faamaumau ai i totonu, o le agaga lea e avatu ai leaga lea e pei e agai mai le sui usufono o Vaimauga 1.

FOFOGA FETALAI: Lea ua maua atu. Fai ma silasila mai i le Nofoa. O lea e taumafai atu le tatou galuega. O lea ua maua. Ae pei ona ou fai atu e le o taua lava le sui usufono mamalu i le saunoaga a le sui usufono. Ae ona lea ou te lagona... lagonaina ia o le ala lena o lea ua tuuina mai. E le mafai ona tuuititia avanoa e ave i sui usufono mamalu, pe Minisita Lagolago pe a o sui usufono mamalu uma e ono faaali o latou finagalo i so o se Tulafono Taufaaofi.

O le tulaga i le... E lelei foi ona faauma atu o le Pre-sitting. O le Pre-sitting ua aloaia i tatou Tulafono Tumau ona o le tulaga lea e faamalamalama atili i Tulafono ma maua ai avanoa o Ofisa Sili o Pulega o Matagaluega e

faamalamalama Tulafono ae le o faamaumauina pei o faamaumauga i a tatou lauga ia e fai i le Palemene. O le eseese la lena. Ua aloaia i tatou Tulafono Tumau ona o le taua lea ina ia maua le avanoa o Faauluuluga o Matagaluega latou te faamalamalamaina ai a o se faamaumauga o finagalo o sui usufono, e le o faamaumauina e pei o faamaumauga i a outou lauga i totonu o le Palemene. O le eseese la lena. Ae malie le sui usufono mamalu mai Vaimauga 1, tuu pea le avanoa i le saunoaga a le sui usufono ua maea foi ona e saunoa i le Tulafono a o le avanoa foi lea o le sui usufono mamalu e saunoa ai mo le Tulafono. Lau Afioga i le sui usufono mamalu mai Siumu.

Tofa Hon TUUU ANASII LEOTA: Ia, leai o lea foi sa saunoa le Afioga le sui usufono o le vaitaimi lena o le fagafalu. Ia tatou te onosai pea ma tatou galulue aua se manuia o le atunuu. Ia, ae pei ona fai atu o le aiatatau lea e taumafai atu i ai ina ia faaali pea o tatou manatu. O lagona e tuuina atu aua foi se manuia o nei Tulafono pei ona tatou talanoaina. Ia ae pei ona ou fai atu, sa ou tutoatasi, na ou fesili i lou itumalo, po o fea le mea ou te agai ai, pe ou te tutoatasi pe ou te alu e lagolago le faigamalo lea ua i ai nei. O le a se finagalo o le itumalo? Agai e lagolago le Pati po o le faigamalo lea ua tulai mai nei. Ia, faafetai mo le tulaga i lea vaega.

Ae, lau Afioga, o le a ou le taua lava igoa o sui usufono ma le tulai mai faalavelave i lau lauga. Se tasi o sui usufono na lauga ma taua ananafi e i ai se sui usufono sa laga i le tatou fonotaga... o le a se faaupuga... Ou te toe fia foi mai i le faiga palota lea e loma nei. Lau Afioga i le Fofoga Fetalai, o na e te silafia o au le sui usufono lea sa faia le faaupuga lea. O lau faamatalaga, e leai ma se isi e le o toe fia foi mai i le isi faiga palota lea o lo o sosoo nei. Ae a valetuulima la outou silasila ma se tatou tagatagai i lena teuteuga e ono le taunuu lea faamoemoe. Ia, o le tala lena lau Afioga. Ou te manatu o le finagalo o le sui usufono mamalu o lea ou te taumafai e avatu se teuteuga i le Tulafono i se auala le talafeagai po o se faiga le amiotonu. Ia faia se auala ou te manao i ai ina ia ou manumalo mai le isi faiga palota. E mamao lava se manatu faapena lau Afioga, o lea sa tuu atu o fautuaga, o upu moni ma upu tuusao. Ia, amuia le sui usufono lea atonu e le o toe fia foi mai ia i le isi faiga palota. E talitonu e le o i ai Tuivalea i so o se faigamalo mai lea taimi i lea taimi... O tatou o sui usufono e tuuina atu...

Afioga Lupematasilia Galumalemana Tologata Togia Tile Leia (Falelatai ma Samatau): Lau Afioga i le Fofoga Fetalai...

FOFOGA FETALAI: Ia, malie le sui usufono mamalu lea e iai le faauilavea. O le a le faauivalea lau Afioga le sui usufono mamalu o Falelatai ma Samatau?

Afioga Lupematasilia Galumalemana Tologata Togia Tile Leia: O se mea e fia faamalamalama i le saunoaga a le sui usufono mamalu. O lea e saunoa mai e le i taua e le sui usufono sa saunoa ananafi lona suafa. Lea foi sa faalauaitele

lau tala na fai atu ananafi. E le i agai lava i le sui usufono se faamatalaga na fai atu ananafi. O le tuualalo lea na avatu o le taua o le system fou lea ua faatulai mai ina ia amiotonu ona faatino le faiga filifiliga a le atunuu. Ioe, ae le faia i se faiga foi lea ia tatou toe sao mai i le faiga palota. Ae pei o lea e tau ese le mea lea e tau agai mai ai le saunoaga a le sui usufono mamalu lau Afioga i le Fofoga Fetalai.

FOFOGA FETALAI: Faafetai. Lea ua maua atu le agaga. Tatou tuu pea le avanoa i le sui usufono mamalu ona e ese foi le latou faauigaina ae lea e maitau eseese le Maota. O le mea lea, lau Afioga i le sui usufono mamalu, faaauau mai lau saunoaga lea ua e faafofoga mai i le fautuaga a le Maota.

Tofa Hon TUUU ANASII LEOTA: E leai sau faamatalaga faapea e le i taua lou igoa. E le o au lea e manao e tau sou igoa. O lea ou te fai atu o le a ou le taua se igoa lea la a avatu ai le faamatalaga leaga lea ou te iloa o au lea e faasagasaga mai ai le faaupuga lea. Ia, pei ona ou fai atu e le o i ai Tuivalea i so o se faigamalo mai lea taimi ma lea taimi. O tatou o sui usufono e tuuina atu tou finagalo ma ni o tatou manatu. O le Malo e silasila totoa iai i le mea moni ma le amiotonu e faavae ai ana Tulafono. O le mea moni a lena. Lau Afioga i le Fofoga Fetalai, ou te fia taua la le Tulafono lea na aveese ai le tatou fale palota i Apia. O le nofoaga faapitoa leni... Mai lava i le 1996 ina ua faatoa ou ulufale mai ai i le Maota leni, o le vaega lava lea o le Tulafono sa tele ai finagalo faaalua a sui usufono o le Palemene aemaise lava i Vaega Faaupufai e talanoa ai Tulafono nei a o le i aumai i totonu o le Maota. O le manatu... o le finagalo o sui usufono ina ia soloia ma aveesea fale faapitoa ia e masani ona fai i Apia. O le mau a sui usufono, aemaise lava o sui usufono mai Salafai ma nisi foi itumalo i tua o Upolu nei, e manumalo mai Savaii ae faiaina atu i Apia. E pei o le latou na talitonuga e aveese ai fale palota ia. Mai lava i tausaga uma e fai ai finauga nei. Ou te manatua... la e silafia foi nisi o sinia o le Maota nei. Sa matou taumafai pea i leni lava mataupu ina ia taofia... taofi le tatou fale palota nei ona o le matou manatu ma le talitonuga maumaututu a malaga tagata uma ia e matai ma e e mafai ona palota e malaga i Savaii. O lona uiga, a o matua e ave uma le fanau, avatu ai ma matua tausisi, avatu ai ma tagata e gasegase ma mamai. O le mea la lea e popole ai, o ai a vaaia a latou meatotino a i latou nei... mea lea la a tuua pe a o ese. Ia a o a foi ni taavale, o ni vaa e feoai ai, a o ni faletalimalo e nonofo ai. Ia, pei o le...

FOFOGA FETALAI: Ou te fautuaina le sui usufono mamalu o lo o saunoa ona e pei e atagia i le saunoaga o se Tulafono ua maea ona pasia e le Maota. E i ai foi le faaeteetega o tatou foi i leni taimi tatou te toe talanoaina ai se Tulafono ua pasia ma aloaia i totonu o le Maota. Ia ae o le tatou Tulafono o lo o talanoaina nei pei o lea e i ai se fautuaga faapena a le Nofoa, e manatu foi ia tatou toe tepa i tua ia ma toe tele ai foi nisi a tatou saunoaga. Ae o le agaga lava ia tatou te piipiiama pea i le tatou Tulafono Tau Faaofi o lo o talanoaina nei e

faigofie ai, ae taatia ia ni mea ua tuanai. Oa ni mea ua tuanai ia tatou faataatia ae tatou alo mo le agai i le lumanai. Ia o se fesoasoani atu lea a le Nofoa i lau Afioga i le sui usufono mamalu.

Tofa Hon TUUU ANASII LEOTA: Faafetai lau Afioga, leai ou te faaaloalo tele i lau afioga ma ou te usitai foi i sou finagalo. O lenei itula lau afioga, ia o nai manatu na ae fia faamauina le lagolagoina e lenei usugafono o le Tulafono Tau Faaofi o le Teuteuga o le Tulafono o Faiga Palota e pei ona lauliliu nei e le Palemene.

Lau Afioga ae ou te le i nofo i lalo, e momoli atu lava la'u faafetai i le Afioga i le Minisita o Galuega, na pau lava lea e puupuu lava. E faafetai atu o lea ua amata lau galuega e alu i totonu o lou aai faafetai a, faafetai foi i le avanoa na e afio atu ai e asiasi lau auala i Saaga ia faafetai tele. Faafetai foi o lea ua alu le auala lea agai i Siumu le Cross Island Road ua faafetai faamalo le galue ia faamanuia le Atua i lau Afioga.

Ia faafetai tele i lau Afioga i le Fofoga Fetalai mo lou avanoa, ia manuia tele tapuaiga a Samoa, manuia foi le tapuaiga a si ou itumalo. Ia manuia le fonu.

FOFOGA FETALAI: Ia malo faafetai i lau Afioga foi i le sui usufono mamalu o se tasi o sui sinia ma sui matua o le Maota. Faafetai foi i lou logosaia foi o se fautuaga a le Nofoa, ia malo lava le fesoasoani mai e faigofie ai foi le tatou galuega. Malo faafetai. Ia o le avanoa lenei o le sui usufono o le Lefaga ma Faleaseela, tulai mai lau Afioga i le sui usufono mamalu.

Afioga MASINALUPE MAKESI MASINALUPE (Lefaga ma Faleaseela): Faafetai i lau Afioga i le Fofoga Fetalai mo le avanoa. E manatu o le tala e fai i le Maota o le Tuiatua e fisaga lava i le matagi ae lili'a lava i Matautu le solo. E faatalofa atu i lau Afioga i le Fofoga Fetalai faapea le Sui Fofoga Fetalai, le afio o le Afioga i le Tamaitai Palemia ma le Sui Palemia faapea foi Minisita o le Kapeneta, o Sui Minisita.

Liliu i le na itu o le malu i le afio o lau Afioga i le Taitai o le Itu Agai, o le Sui Taitai faapea foi ia sui usufono uma o le Palemene.

E faatalofa atu foi i lenei taeao matagofie i Ofisa Sili o Pulega o Matagaluega aemaise foi o Faalapotopotoga Tumaoti i ē ua faauluulu i ai. Le Afioga i le Failautusi ma le Sui Failautusi aemaise foi o le aufaigaluega a le Fonu Aoa, e maitauina foi i lenei taeao o lea ua tatou mafuta ma aoga tulalata i le taulaga i susuga i alii ma tamaitai faiaoga e tusa ai o polokalame faataatitia a le tatou Ofisa. E i ai le talitonuga o paia, o sa ma mamalu o le atunuu o le a nuunuu faatini o tausala aua o le fatuaiga tausii lea a faleupolu tofia.

Ae na ona ou fia tulituli o le taimi, e avea ai lou leo e faailoa foi i le matou itumalo o Lefaga ma Faleaseela e tusa ai o lenei Tulafono Toe Teuteu o le Tulafono o Faiga Palota. Ae le i alu loa e faatalofa atu i nai ou Tama ma Tina o lo o faapea ona tofofi e le Atua e galulue i totonu o si o matou itumalo, o i latou o lo o faapea ona nono ni manu aua ni manuia o le afioaga, ia ae faapitoaugafa se faamatalaga i le Toeaina Faatonu ia Nomeneta Simanu faapea foi le Faletua ia Taua e tusa o le tapuaiga i lenei taeao.

Ou te talitonu o lenei lava Tulafono o se Tulafono e taua i lona toe teuteuina, e manatu o le lagona lava lea o lo o i ai pea i itumalo uma, o le faatutugata i le tulaga o le faatinoina o le resitala. Sa i ai foi le talitonuga o lenei itumalo i le tulaga foi lele o le toe i ai o nisi o galuega e toe faatino. Peitai o le agaga maualuga ina ia malamalama si ou itumalo i le tulaga o lea ua i ai le faataatiaga mai foi o lenei foi Tulafono Tau Faaofi o le Tulafono e Toe Teuteu ai Faiga Palota ua lava ma totoe le saunoaga a le Afioga i le Minisita e ou le Tulafono lenei, atoa ai ma le fonofaapipii a le Tamaitai Palemia i le aso ananafi o lea ua manino ma ua malamalama ai tulaga uma e pei ona i ai. O le agaga lava e fia faamanino ma faailoa, e pau lava lea o le tulaga e tataua ona malamalama i ai nai o tatou itumalo, ia e le faapito lava sau faamatalaga i si ou itumalo o Lefaga ma le Faleaseela. O lenei e moni lava i lenei Tulafono ua leva na faatino e tusa ai o le faitau atu i ai i le Tulafono fou lenei, ua obsolete le system. O lona uiga o le system ua le toe faaaogaina ua le o toe aoga. E pau lava lea o le tulaga e faamautu ai ma pipii ai sou taofi i le tulaga e pei ona i ai le teuteuga lenei ina ia manino ma malamalama e le mafai lava ona tatou toe alo pe tatou te manatu e tatou te savavali pea i le Tulafono e pei ona i ai le system tuai. O lea ua fou. E i ai lava le upu e faapea o le taimi ma le tai e le faatali i se tagata, o lenei vaitau o le vaitaimi o le laalaa i luma, ia tatou savalivali i luma aua ni suiga lelei.

E le tumau ai pea le soifua ma le ola i ni mea tuai. A tatou fua foi i le tele o atunuu, ia o lea lava ua faagasolo, faagasolo lava ina ia o tutusa le tulaga ua i ai le Tulafono ma lenei foi vaitau ua soifua ma ola ai. E i ai foi le talitonuga e pei ona i ai ni atugaluga o nisi i le tulaga lava lea o le verification, o le faamaoniaga ua lava foi le saunoaga a le Komesina o Faiga Palota i le aso o le tatou Pre-sitting. E leai ai se popole i lou sui usufono ina ua faamalalama mai ua uma ona uia ma talanoaina e le latou Ofisa tulaga uma e i ai le faatinoina o le vaega lea. O lona uiga o le matafaioi lava lea a le Komesina o Faiga Palota ma le latou alofaiva foi i le latou matafaioi.

O le tulaga i le faagasologa atoa o le resitala e pei ona i ai le Vaega 13 ma le faataua o le Vaega 23 ia e au foi lou sui usufono aemaise foi o si o matou itumalo i le tulaga e pei ona i ai le suiga ua i ai. Ua tatou laalaa i luma mo le faatinoina o fuafuaga uma, e matagofie. I taeao uma lava ae le i... e masani na susue lau Tusi o le Tusi Faitau Aso, e tapasa ai lea aso ma lea aso. O le aso ananafi o le theme po o le autu o le galulue faatasi ia o le agaga foi lena sa i ai, ina ia o tatou galulue faatasi e opogi le faamoemoe ua i ai. Aepeitai o lenei taeao ua ou vaavaai atu i le autu o lenei aso, ua alia'e le tetee, e ese le... ou te le tau selu i le faatinoina foi o nei Tusi Faitau Aso ae ese le talafeagai i so o se aso ma so o se taimi i mea e tutupu.

Ia ona i ai lea o le manatu maualuga e le mafai ona aveesea le aao laveai o le Atua i luga o le Palemene a Samoa, mai lava i Taitai o lo o faatinoina galuega aua se lelei auiluma. Ia na o le faaoo atu o lenei feau i le Komesina o Faiga Palota aemaise foi o le Minisita, ia e le o se faatonuga ae na ona sina tuualalo ia lava le faalauiloa. A lava le faalauiloa i o tatou tagata ona malamalama lelei lea. Po o le a lava le malosiaga e oo i ai o so o se TV o lo o i ai nei ma so o se faasalalauga i Nusipepa ma mea faapena, na o le pau a lea o le tuualalo ia lava

le faailoa ona o tatou tagata e faatutugata ae a malamalama lelei i le tulaga e pei ona i ai lenei vaitau, ina ia maua le silafia e o tatou tagata uma o le agaga lena o lenei sui usufono ma lenei itumalo ina ia aua lava ne i faaletonu, aua foi nei tuuaia ua le maua le faasalalauga ae pei o le agaga lea mo le faasaoina foi o le taimi.

Ae o le talitonuga o le agaga foi o lenei sui usufono ma lenei itumalo o Lefaga ma Faleaseela, e lagolagoina lenei Tulafono aua le agai i luma. Ma le faaaloalo lava faafetai tele i lau Afioga i le Fofoga Fetalai ia faamanuia foi i le Palemene, aemaise o fuafuaga uma e pei ona i ai. Manuia le Fono.

FOFOGA FETALAI: Malo faafetai le saunoa i lau Afioga i le sui usufono mamalu mai Lefaga ma Faleaseela, ua malo faafetai mo lou sao aemaise foi o le tuualalo aua lava le tapueina atili o lenei Tulafono Tau Faaofi aemaise foi o lou tiute faa Aoao Fesoasoani, malo faafetai mo le fesoasoani mai i le tatou Tusi Faitau Aso, e faamanatu mai foi mo le tatou Palemene. Ia malo faafetai. Ua i ai le manatu o le a lafo atu i lea itu, o lea ua vaai atu ua fou mai le sa o le sui usufono mamalu mai Anoamaa 1.

Ia o le avanoa lea o lau Afioga i le sui usufono mamalu.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): Faafetai i lau Afioga i le Fofoga Fetalai mo le avanoa mo lenei itumalo se i fai foi sina motugaafa, aua le Tulafono taua ua opea nei i le Laulau a le tatou Fono. Ua e topule lo tatou olo punimatagi i so tatou nonogamanu ma le faautugatagi i le Atua Silisili Ese o le Lagi ma le lalolagi i le taeao ua sola. Ia faamalo le fai o le faiva i lau Susuga i le Aoao Fesoasoani po o lau Afioga foi i le Fofoga Fetalai.

O lenei foi taeao o lea ua suluia malama ua faataa foi le manufanua ae talalaumea le manu o le vao. Ua faataalise foi manu o le vaveao a o upu foi e fai i eleele o le matou itumalo, ia e fesili lava Mauga Loa ma Mauga o Samoa ia Fao po o ua ao. Samoa i lau maleifua mai i lenei taeao, aua lau sausausama ma lou alofaiva, ia auaiitia e le agaga o le Atua faamoemoega o lenei aso.

O le paū o le tuaau ma fuamalu i le Malae ma le Maota i Tiafau, leaga o lele ua tauaofia ma ua potole Palemene o Samoa. A o le Malae foi e fusi ai le fau o Malo aua le sailigamalo o la e tapuai mai Samoa. O paia la o le tatou atunuu, paia o le Malo, o le a taalolo, o lea foi ua maea ona oo i ai saunoaga o lenei taeao.

E faatalofa atu foi i paia o le Atua i le aufaigaluega tofifi a le Atua i fatafaitaulaga e fia, malo le tatalo, faafetai mo la outou tapuaiga, ua manuia ai faiva.

O le faatulai mai o le Tulafono o Teuteuga o le Faiga Palota, ia o lea lava sa fai atu le matou tala i le tatou Pre-Sitting e matou te lagolagoina le faamoemoe, leaga e tataua ona alu i luma le tatou Malo. E lua lava mea tetele o lo o aafia ai, o le resitala i luga e faaoga i ai upegatafailagi ma tekonoosi faaneionapo, aemaise o le toe faia lea o le resitala e faaoga i ai se tatou faavaa fou po o se system fou pei ona filifili i ai le Komesina ma le Matagaluega. Na pau lava

atugaluga e lagona uma e sui usufono uma o lenei Maota ma sui o le tatou Fono, e popole lava i le taimi, ona ua utiuti le tatou taimi.

A tatou toe manatu i le taimi ua sola i isi palota ia ua uma nei, faaleagaina fale i le tumutumu o le atunuu, leaga o le atunuu e tuu lava i le taimi mulimuli. E fiu foi le aufaigaluega e tuli, e fiu e o atu, o le mafaufau lava o tatou a le suia, ou te alofa la i le afioga i le Komesina ma lona Ofisa i faaleagaina le tatou fale fou lea faatoa uma ona fai i le afifio mai ma talaaao mai o le atunuu e fia auai. O le mea moni lava i le Tulafono tuai, e faasala le tagata e le resitala. Tasi lea mea o lo o i ai i totonu o le tatou Tulafono, e tatau foi ona nofouta i ai le atunuu. Ia a o fea la e maua mai ai faamaumauga na? Ia o lea ou te vaai atu e lototele lava le afioga i le Komesina.

Na faaalua e le isi lauga ananafi, o lou atugaluga foi lea, ou te alofa foi ma ou faafetai i sui o le tatou atunuu i tamafanau, ae fou... e talavou foi le tamaitai lea fai mai o ia o le Programmer, o lea na ia tusia le tatou system lenei. Afai la ua lelei i le latou maitau, o lona uiga o lea e lelei i se toaselau ua faataitai i ai, ae a tuu loa i ai le 100,000, o atugaluga la na. E feoloolo le mea obsolete o la e aoga, ae leaga le alu alu o le tatou mea te i ua crash le tatou system ae le i tau lau o le faamoemoe. Aua o le mea moni lava, sa tatau ona i ai nisi e fesoasoani faa-konesale foi lea se i vaai pe o le a le malosiaga o le mea lea o le a tatou faalagolago i ai. O upu masani lava ia o mea o computer na ota faalogo a i aso ia faatoa tau aumai, computes in computes out. O a mea e tuu i totonu, na pau lava na o mea e aumai fafo e masini, aua e faatonu e tatou le masini. O le atugaluga la lea, e le i faataitai muamua, e le i faapea ua faaoga i se isi atunuu, ae faalagolago uma atu i ai le atunuu o Samoa, ae sau ua le aoga. Ia talosia. E pei ona ou fai atu, e lagolago i le Tulafono, ae o atugaluga na. Ua fia ni system ua fai e le tatou afafine lea i le taimi ua sola? Ia o fesili ia e tatau ona tatou fesiligia. Afai lava la ua faataitai i se toasefulu po o se toalmasefulu, ia talosia ia. O le matou tala lea i lau Afioga i le Fofoga Fetala.

E avea foi lenei avanoa e matimati ai le aai o finagalo i si ou itumalo, aua o lea ou te vaai atu e pei e lona lua au i le faasologa lea e faasolo ai. O faasologa uma lava e agai mai le Vaimauga 1 e taamilo faapea, a o lea pei a avea le Anoamaa 1 ma le Anoamaa 2 e faataitai ai pe lelei pe le lelei.

O le mea la lea a o faafogafoga mai si ou itumalo, ia, o ifo e lagolago le faamoemoe lea o le a alu atu, o ifo e lagolago ma o ifo e resitala i le tatou faiga palota ne i te i ua faasalaina se toeaina ona toe tele ai foi lea o nisi galuega e mulimuli ane. O lea foi e tatalo atu i pulenuu o afioaga ma nuu, ia, o lo outou tiute lea ia outou galulue ina ia tau lau o faamoemoega.

Ua fai lava ma tau soo le Fono Faavae, ua fai ma tau le Ofisa o le Fono Faavae. Ia, e pei o le a tele mea o le a lafo atu i le Fono Faavae, ae manaia foi lea, o le tagata o le a i luga o le lisi fou lea, pau lea o le tagata o le a manuia mai le Fono Faavae. O tatou nuu ma itumalo, ia o ifo e faatino le tatou resitala. E pei foi ona ou tatalo atu, e tatau ona faaumiumi se taimi e avanoa ai le Ofisa pe a malaga atu i nuu i tua, leaga e tele o tatou tagata faatoa maua nai avanoa i le afiafi. Ma le agaga faaaloalo, o lau talosaga lea. A o lea e lafo atu lava i le afioga i le Komesina i le taimi o ana faalauiloa ma...

Na pau lava le mea na ou faalogologo lata mai nei, ua i ai isi tagata ua tailua pepa fanau la e feoi ma latou. Ia o tala lava na ota maua nei foi i le TV ma mea a le Ofisa o Leoleo. Ia tasi lea popolega e tatau ona silasila lelei, talosia ia maua i le taimi foi lea e fai ai tatou fingerprints ma tapue ai tatou ata, ina ia aua ne i tulai mai ni tagata e resitala faalua.

A o le tulaga o le aotelega o le Tulafono lau Afioga, e lagolago tele i ai le matou itumalo i le vaaimamao ina ia laa i luma le faamoemoe o le tatou atunuu. Ia manuia le tapuaiga a si o matou itumalo, manuia foi le paia o lenei Maota i Ofisa Sili o Pulega o Matagaluega aemaise nai alo ma fanau. Faafetai foi ua auai mai latou, atonu o le a faaosofia moegaluaga o le a fia faipule uma tamaiti ma teineiti o le tatou Malo.

Ia manuia lau Afioga i le Fofoga Fetalai. Soifua ma ia manuia.

FOFOGA FETALAI: Malo faafetai saunoa i lau Afioga i le sui usufono mamalu, o se tasi foi o sui usufono matua o le Maota, ae faigata foi lau Susuga Lufilufi. Malo mo le tanoa. Faafetai foi mo le fesoasoani i le tatou Tulafono aemaise foi o le faalaeiau i itumalo ma le tatou atunuu ina ia galulue faatasi e lagolago le tatou Tulafono, aemaise foi o fautuaga i le Komesina ma le Ofisa, ia o lea lava ua oo i ai le saunoaga ma le fautuaga ma le timaiga. Malo faafetai. Ia, talu ai ua tatou oo mai le tatou taimi malolo...

Susuga Hon Tuilaepa Fatialofa Auelua Sailele Malielegaoi (Taitai o le Itu Agai): Lau Afioga i le Fofoga Fetalai, pau lava si mea lea i te i ua tatou malolo ae le i faamalamalamaina. O le faaiuga o le saunoaga a le sui usufono faatoa mavae atu nei le tootoo, e i ai tagata e lua asofanau. O au la e lua ou asofanau. O le asofanau sao e le o faamaumauina i pepa a le Malo, ma lou asofanau sese na fai e tau tuutuu ai i lalo lo'u matua, ua ou matua tele ae tau sue se aoga ou te aoga ai. E fai lava la si toatele o tagata i le matou taimi e atamamai uma lava e pepelo i asofanau ona o mea ia a papalagi na fai, e oo loa i i ua e le toe aoga. E aafia uma ai lava Initia, o Aferika atoa, o ē sa pulea e papalagi. Ae le o faaaogaina la lou asofanau sao, na o le asofanau lava lea ua aloaia i pepa a le Malo lea ou te talavou ai, ae ua tuu lo'u asofanau sao ou te toaina ai. E le o faaaogaina la le mea lena, ae ina ne i te i ua manatu nisi o la e agai mai le lauga ia te au. E leai, o la e agai ia outou ia e taitolu pepafanau, o la e faaaoga uma.

FOFOGA FETALAI: Ia, tulai mai lau Afioga i le Minisita mo Faatoaga ma Faiga Faiva.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau Afioga i le Fofoga Fetalai ona o le taua tele o le saunoaga a le Taitai o le Itu Agai. Leai o lea ua tautino le mea sa ou saili, umi tele. O le Afioga i le Taitai o le Itu Agai, e faamanatu faatasi o ma asofanau, aso 14 o Aperila i tausaga uma e feula faatasi ai le ma keke. A o lea la ua ou iloa nei, e sese le aso la e ua tau e le Taitai o le Itu Agai. Sa ou vaai la, o le a le foliga lea ua aumai? O lea faatoa 80 ona tausaga, a o lea ua tautino nei, lona uiga ua aulia

lou 90 tausaga. O le manatu lea ua ou manatu e tatau ona faasao leaga o lea ua e saunoa nei, e pepelo lona aso fanau lea. Ma le agaga faaaloalo.

FOFOGA FETALAI: Malo faafetai. E leai e aoga foi le fesuata'i a outou le aumatutua o le Maota. A o le agaga ia o le lauga a Lufilufi, e leai e faamalulu atu i lau Afioga i le Taitai o le Itu Agai, o fautuaga faalauaitete. E le o agai sao atu. Se i tulai mai le sui usufono o Anoamaa 1.

Afioga Alaiasa Moefaauouo Malagaitutogiai Sepulona Moananu: Ia o le mea sili o lea ua tatou iloa e leai lava se tagata e atoatoa i lenei lalolagi. O lea lava ua tatou... Ae o lau faamatalaga na fai atu lau Afioga i le Fofoga Fetalai, o le tagata e lua pepafanau, ae o lea ua saunoa le Taitai ma le Tama o lenei Itu, e leai e lua ona asofanau. E eseese mamao lava la mea na e lua. O lea sa matou auai i le faamanatuga o lona asofanau mo'i lata mai nei lava. Ia, ae pei o le agaga lona lau Afioga i le Fofoga Fetalai. Manuia le tatou Fono.

FOFOGA FETALAI: Malo faafetai. Ia talu ai o lea ua tatou taunuu i le tatou malologa masani o le taeao, o le mea lea o le a faataatiaese Galuega a le Fono Aoao mo le malologa o le taeao.

Na faataatiaese Taulumaga a le Fono Aoao Faitulafono mo lana malologa masani o le taeao i le itula e 10:50 ma toe faaauau i le itula e 11:44 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Faafetai ua saualo le tauteaga a le paia o le Palemene ma le tatou Maota ma e i ai foi le talitonuga ua faaosofia moegaluaga ma ua maua se malosi e taualo ai le tatou galuega i lenei aso. Faafetai i le Atua mo lana foai.

E faataatiaese tatou Taulumaga mo le malologa ua maea le saunoaga a le Afioga i le sui usufono mo Anoamaa 1.

A o le i tuuina atu le avanoa mo se isi sui usufono e fia saunoa ia na o se toe faamanatu i le tatou Maota aemaise sui usufono mamalu e le i saunoa. O le tatalo lava ia a le Nofoa ia outou alolofa e lelei ona agai tonu a outou saunoaga i le faavae ma aoga eseese o le Tulafono Tau Faaofi, o aiaiga foi ia o le tatou Tulafono Tumau. Ae mo le faasaina o le taimi o a outou saunoaga e i ai le agaga o le Nofoa, soia tatou te agai fua i saunoaga a isi sui usufono ma le toso ai o le tatou galuega. Ae faaauau le tatou galuega ma tatou agai tonu i le taua ma le faamoemoe o le tatou Tulafono Tau Faaofi.

Ia, o le avanoa lenei mo se tasi o sui usufono e fia saunoa.

Ia o lea ua... malie lava le sui usufono o Sagaga leaga ua leva ona taumafai mai le sui usufono o Salega 1.

Lau Afioga i le sui usufono mamalu o Salega 1 o lou avanoa lenei.

Afioga FEPULEAI FAASAVALU FAIMATA SUA (Salega 1): Faafetai mo le avanoa lau Afioga i le Fofoga Fetalai. Faafetai foi i lau Afioga ma le paia o le aufaigaluega mo le taligasua, le taumafataga na tapenaina ma saunia aua foi le paia ma le mamalu o le Palemene. E faatalofa aloaia atu i lau Afioga i le Taitai o le Malo ma le Kapeneta, lau Afioga foi i le Taitai o le Itu Agai ma lea itu o le Maota i le mamalu o le Palemene.

E avefa foi lenei avanoa e faafeiloai atu ai i le tapuaiga a si ou Itumalo, Samoa ma ona tulaga faalupe, e talitonu o lea ua uma ona saunoa i ai lau Afioga i le Fofoga Fetalai i le taeao ua sola.

Ae faafeiloai i lou itumalo ma lana tapuaiga, faafetai foi i lo outou finagalo pei ona tatou feiloai ai ma faasoa i lenei Tulafono Tau Faaofi. E ui lava ina laitiiti le taimi sa maua ai, ae i ai le talitonuga o lo o tapuai totoa, o lo o tapuai nonofo foi ma tapuai tatalo aua le faasologa o le faaofiina o lenei Tulafono ua tapenaina aua le Faiga Palota i le 2026.

Lau Afioga i le Fofoga Fetalai, e tulai lenei itumalo e faaleo se lagona e ala i lenei Tulafono Tau Faaofi o lo o faapea ona talanoaina.

I le mataupu e pei ona faailoa mai e le Afioga i le Minisita, faafetai tele mo le Tulafono. E manatu lava lenei itumalo o le Tulafono Tau Faaofi e mafai foi ona matou faapea atu, e le o se Tulafono e i ai se faaletonu. Ae mafai foi ona matou faauigaina faapea lenei Tulafono, leai lava ma se eseese o le talanoaina o se Suafa Matai. O le aumai o se finagalo ae felafolafoai le paia o le aiga. O le tele lava o nofo a Suafa e i ai Suafa latou te teena e nonofo, e i ai nisi itutino o aiga latou te le mananao e nonofo isi pe faamatai nisi. Ae a faafofoga i le saunoaga a le Sa'o o le Aiga, o tatou nofo ia o le a fai. O le uiga o lau faamatalaga ma se lagona o lenei itumalo, matou maitau mama i le Saunoaga a le Taitai o le Malo i le aso ananafi. O le Tulafono lenei ua tataua ona faatino. O lona uiga e faamoemoe i le maliega ma le autasiga o le Palemene o Samoa.

O le ala lea o se lagona e tautatai i ai se lagona, e leai lava ma se eseese o le talanoaina o le mea lea o le Suafa Matai. E i ai itutino e tete'e e le matai isi, e i ai foi itutino e malilie e faamatai nisi, e i ai foi itutino e aumai foi a latou mau i le mea e le mananao ai.

I le talitonuga la i lenei Tulafono, o lea sa pasia le online i le 2019. O lona uiga ua leva lava la ona i ai, a o le faalateleina o pou o le faleie, tulou, lea la e tau poupuu atu ina ia mafai ona faasavali le polokalame.

Lau Afioga i le Fofoga Fetalai, e i ai atugaluga o lou Itumalo o lo o faafofoga mai lou Itumalo i lenei ituaso ma lenei taimi. O lea o le a faaleo lo outou atugaluga ma lo outou popolega ona o ni faafitauli ne i tutupu mai ona outou sa'i mai lea i lo outou sui usufono i le lē faaleoina.

Lau Afioga i le Fofoga Fetalai e tauala atu, o le atugaluga o lenei itumalo, e silasila alofa i sui usufono o le a tauva mo le Nofoa lenei. Fai mai le latou mau, ne i meaane ua faatu mai se Sui Tauva mai atunuu mamao ona tele lea o le afaina. Ia, sa tali lava i ai i le faamalamalamaga, e leai se mea faapena o tupu, e leai se vaega faapena o le Tulafono o aumai i le vaega lea.

Fai mai le isi vaega o le atugaluga, o le mea lea sa i ai, manaia ia o le Palota lea sa fai i le 2021. Na iloa mai lava i Salafai le tagata e malo ae na o nai vaega laiti lava na faaopoopo i Tumua nei. A o le mea lea sa i ai, po o le a lou

manumalo mai Salafai, tulou, po o Nuu i tua, ae avatu loa palota i totonu o Upolu po o le special vote lea, tele loa le afaina.

Lau Afioga i le Fofoga Fetalai o atugaluga po o popolega o le Itumalo ae o lona lave e taua le faamalamalama ina ia malamalama sui usufono o Itumalo. O le Tulafono ua na o le resitalaina lava o sui palota. O lona uiga i lau faalogologo ma le matou faalogologo i le saunoaga a le Afioga i le Minisita e ana le Tulafono ua faafaigofie ona resitala tagata. O lona uiga la, afai e online mai Niu Sila, Ausetalia, Amerika po o fea le itu o le Lalolagi e online mai ai, e leai lava la se eseese ma le online mai Savaii i Salega po o fea lava le Itumalo. Ae pau lava lea o le mea e manaomia ai, o le afio mai ma susu mai e fai lelei ia fingerprints ia ma lona ata. E pei na pau ia o vaega sa i ai popolega ia ae ua faamalamalama. O atugaluga ma popolega ia sa tau polepole ai le uiga o le faamoemoe o lenei itumalo.

O faafitauli, e maitauina so o se mea fou e i ai lava ona faafitauli. Silasila foi i le tatou poloketi miliona, tulou, se i ou oo i ai, faatoa tau amata. O le a le tala? Tele o faafitauli lea e tutupu. Faatoa iloa isi faafitauli ina ua faasavali le polokalame. E a le taimi lenei? Ua fofu le faafitauli.

E faapena foi se lagona o lenei itumalo i le latou silasila ma le vaavaai i lenei Tulafono lea ua amata ona tatafa ata ua na o le resitalaina o sui e palota. O ni faafitauli e tutupu mai i le talitonuga o lenei itumalo, a tatou galulue faatasi ua faaitiitia ma leai ni faafitauli.

I le fautuaga a le Itumalo, e le mafai ona galulue na o le Komesina o Faiga Palota ma le Minisita ma le Matagaluega. Ae a galulue faatasi uma Matagaluega a le Malo e pei o le Fono Faavae. Aua o le upu moni lava, i le taumafai e fufulu, tulou, pe kilini le Lola na o sui lava o le Fono Faavae lea e i totonu o le afioaga latou te iloa uma lava tagata ese ma tagata moni ma tagata totino ma sui faamaoni o le nuu ma le itumalo. Aua e avatu loa... afai e faataga mai e le Komesina ma le Minisita ona tufa mai Lola lea e i ai ata i totonu o le Fono Faavae e galulue ai le Faipule ma lana Fono Faavae. E faafaigofie ai loa i ina ona faamama le Lola i ē ua valaau i ai le Atua ia ma i latou foi o lo o aumau i atunuu mamao. Ia ma le mea e pito sili ona faaletonu, o ē e leai ni piitaga ma e leai se agavaa e palota ai i totonu o itumalo taitasi. O le fautuaga lena a lenei itumalo i lenei Tulafono.

O le tulaga o le faafitauli, ia lena ua faailoa atu. A galulue faatasi tatou ona maua lea o le sologa manuia o le taumafaiga a le Minisita ma le Komesina o Faiga Palota.

Na fesili mai le matou itumalo, ua tele Tulafono. A o le a le tou pese sa pese mai tua? Ua faanota le pese na tou pepese ai? A o le a le ki lena o le a ta ai le pese?

Lau Afioga i le Fofoga Fetalai o lea ua amata ona faanota le pese lea sa pepese ai. O le a le pese? O le a agavaa tagata uma mai atunuu e mamao e palota i le faiga palota tele lea o le a tapena. O lona uiga o le Tulafono i le taeao lenei, o le isi lea nota o le piano lea o le a ta. A o le ki o le pese, ou te iloa afai e malamalama le ta piano i le ki e sili ona faigofie, o le ki lea e tau o le ki C. E leai a ni mea e fai na o le oomi lava o le nota paepae. O lona uiga afai o le

masini lea o le a aumai po o le resitala lea o le a fai, o le faiga faigofie lea, resitala mai lava i luga, Savaii, tua, aemaise atunuu mamao...

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai pe maua se avanoa...

Afioga FEPULEAI FAASAVALU FAIMATA SUA: E faigofie ai lava ona ta le pese.

FOFOGA FETALAI: Malie le sui usufono mamalu. Ia se i tulai le sui usufono o Vaimauga 1, o le a se mea o e fia...

Afioga Sulamanaia Fetaiai Tauiliili Tuivasa: Ioe, o se mea e fia faamalamalama. O le sui usufono nei o le Taitaifono o le matou Komiti, e ui foi o i ai ni tulaga i Faamasinoga foi a le Malo ia ae e faaaloalo ai lava ona o le Taitaifono o lenei Komiti. A o le mea e fia faamalamalama leaga o lea ua saunoa le sui usufono i le ki lea ma le... O la e mafai ona palota mai tagata mai fafo, e le o se mea fou la i le Tulafono lenei, o lea na tatala lava i le Tulafono tuai lea na i ai e afifio mai o tatou tagata mai fafo e omai e resitala inei ma palota. E leaga o lea e pei e maua i le sui usufono, o le avanoa lenei o lea o le a omai ai tagata ma afifio mai. O lea e i ai lava i totonu o le Tulafono, o lea foi e iai le mea lea o le online i totonu. Ne i te i ua sese leaga o lea e pei e fai mai, o lea o le a tatala ai i le mamalu o le atunuu mai fafo. O lea e i ai i le Tulafono. E pau lava le pese lea na faasalalau e latou, o le a outou palota mai lava outou i ina, o le a tou palota... A o le mea lea na i ai, o lea na i ai lava i totonu o ai lava o le mamalu o le tatou atunuu i fafo e fia afifio mai, e omai la inei i Samoa e resitala ai i luma o le tatou Pulega a alii ma faipule ma iloa ia ma resitala ai. E le o se mea fou la, pei o le agaga lena e fia fesoasoani atu ai i le sui usufono o lo o saunoa lau Afioga i le Fofoga Fetalai.

Tofa Lealailepule Rimoni Aiafi (Faleata 3): Lau Afioga i le Fofoga Fetalai...

FOFOGA FETALAI: Ia mo le faasaoina o le... se i tulai mai le sui usufono o Faleata.

Tofa Lealailepule Rimoni Aiafi: Faafetai lava i lau Afioga i le Fofoga o le Fono. O le vaega foi lea e fia faaopoopo ai lau Afioga. O le tatou Tulafono lea e manino lava, Registration, o le Resitala. E leai ma se vaega o le Tulafono o taua ai le palota, faiga o lau palota, voting ma le faaaloalo lava, faafetai.

FOFOGA FETALAI: Ia masalo le sui usufono mamalu o lea ua faafofoga foi i nisi o fautuaga a sui usufono o le Maota. O le agaga lena o le taumafai lava ina ia agai tonu i le tatou Tulafono Tau Faaofi.

Afioga FEPULEAI FAASAVALU FAIMATA SUA: Faafetai, faafetai i lau Afioga i le Fofoga Fetalai. Leaga o lea ua tulai le sui usufono lea o Vaimauga ma faalavelave i le lauga a Salega ia ma afea ai tulaga o le Faamasinoga. Ia, tau saunoa mamalu leaga e le o se Fale Faamasino le fale lenei. Aua le oo i le mea e le tatau ona oo i ai o lea e faafofoga le atunuu ma Samoa atoa, ia e tausi mamalu i lo tatou va nonofo a o le tulaga i le Faamasinoga e le o se mea lena a oe o le mea lena a a'u.

Ia faafetai mo le fesoasoani mai. O le tulaga lea na taua faapea e palota mai tagata mai fafo e sao lelei, se o lea ou te malamalama ae o le tau faapulapulaina o le vaega lea ina ia mafai ona palota mai i le online. Ia e le o i ai la i le Tulafono lea a o le taumafaiga e faafaigofie ona resitala.

O le tulaga foi lea na tulai mai ai le sui usufono o Faleata, e sa'o, ou te le o talanoa i le palota. Ae ala ona resitala le tagata o le palota e le o se resitala o se tufagatupe o le resitala i le faiga palota mo le silafia.

O le isi fautuaga a Salega leaga o lea na maua i le Afioga i le Minisita e omai tagata mai fafo e fai a latou fingerprints ma ata. O le fesili la, a oo la i le palota e toe omai? O le tali, o lea e auaua'i mai nota o le pese po o le a le taina o le pese. E le mafai la ona ou fai atu o le a palota mai fafo se i faasolo mai nota o le pese po o le a le taina o le pese, pe pao i luga pe pao i lalo pe faasasao le pesega o le pese.

Lau Afioga i le Fofoga Fetalai ma lau Afioga i le Minisita e ona le Tulafono, faafetai mo le Tulafono, ua faalautele ai lea vaega taua ma o le a mafai foi ona matou... O matou i Savaii i Salega o la ua lelei lava le fesootaiga faaneionapo o lea o le a matou resitala mai lava i Savaii, ae manaia le ave ifo o se Ofisa i Salelologa ia pe agai atu foi le Komesina ma lana aufaigaluega i totonu o Fono Faavae e fai ai matou mea ia e totoe e faafaigofie ai le galuega. O le aotelega lau afioga i le Fofoga Fetalai e talia e lenei itumalo le Tulafono Tau Faaofi. Ia manuia le fonotaga.

FOFOGA FETALAI: Ia malo faafetai, faamalo le saunoa i lau Afioga i le sui usufono mamalu o Salega 1, faafetai foi mo lou finagalo faaalua a o faafogafoga foi le paia o le Maota. Ia o lou avanoa lea Sagaga 2 lau Afioga i le sui usufono mamalu.

Susuga MAULOLO TAVITA AMOSA (Sagaga 2): Faafetai mo le avanoa lau Afioga i le Fofoga Fetalai. O le a ou le toe tailia tulāfanā pe ou te toe falo foi le afaloloa i sa ma faiga o le Fonousu a le Palemene nei. O lea ua maea ona papae ulufanua ma faatulima lau Afioga e le gata i le Palemene a o le tapuaiga foi a le tatou atunuu.

Ae se i taumafai atu ia se motugaafa foi ma se vaivaiga foi a le itumalo o Sagaga 2 ia o lo o faafofoga mai foi lo matou nuu i Malie, Afega ma Tuanai se i taumafai atu se tatou sao foi i lenei mataupu taua. O le Tulafono lea ua faafofoga ai i le aso ananafi ma le aso, o le agaga e lagolago ae i ai nai atugaluga, o atugaluga ia ua tele na saunoa i ai sui usufono, o atugaluga ia i tulaga o le system pe gafatia. O lona capacity ma mea faapena. Peitai la o se tualalo a lenei itumalo e ese mai la i lea tulaga, i le tulaga lea o le a uunaia ai

loa le resitala mai fafo. O se mea lelei o se avanoa lelei lea mo tatou tagata aua a resitala a faateleina le resitala o lea e faamalosia ma le palota, o lona uiga o le a faateleina foi le numera o ē palota mai. E tele foi lo latou sao e le na ma le laina lena mea. Ae o le uiga la o lau faamatalaga, o le uiga o le upu sitiseni Samoa o tagatanuu Samoa. Afai o lea ua tatou tuu i ai le avanoa e resitala ma sau e palota ia tatou vaavaai i aafiaga o le tamaoaiga, aua e lelei lava le tapena atoatoa lo tatou sa, a oo i le tulaga e faatino ai ua leai se vaipanoa e le i oo i ai le auiliiliga ma liliuina o le tofa ma le utaga, o lea ua tatou galulue faatasi. Se i ou avatua lava nai numera faataitai ia lau Afioga i le Fofoga Fetalai, o fuainumera mai le New Zealand Bureau of Statistics o lo o faapea mai. O tagata Samoa i Niu Sila e 182,721. O potential voters po o i latou e mafai ona agavaa i le mea lea o le resitala mai mulimuli ane ma palota e 107,000 e 107,000. O le aofai o tagata palota i Samoa i le palota talu ai e na o le 128,825. Afai la o Niu Sila le numera lea e 107,000, tuu la i ai ma Ausetalia, tuu i ai ma Amerika, o le a le tulaga o le a i ai tatou? O fea e faimeafaalogo i ai le Palemene lenei? Tasi lena.

Lona lua, o mea lava nei o aia tatau faasitiseni po o tagatanuu. O le aofai o le au penisione i inei i Samoa e tusa ma le Lipoti, Annual Report a le NPF 2021/2022, e 11,198. O le tupe na faaalua ai e \$27miliona na alu i penisione. O mea ia e maua mai i Niu Sila i le latou Bureau of Statistics e faapea, o le aofaiga o Samoa ua silia le 65 tausaga e 9,774. O lona uiga a tuu i ai le tulaga o le tatou penisione e te talanoa e le itiiti ifo i le \$23miliona. O le fesili; e agavaa sitiseni nei mai fafo i faamanuiaga nei? O le uiga lena o la'u faamatalaga e agavaa? E lelei ona tatou tapena uma vaega ia manu a tatou le i vavevave i ai ae lelei lava le tuu atu faafautuaga a aoga faafetai ae a leai foi mai ia Sagaga 2 se manatu. E le gata i lea, asiasi mai le sitiseni Niu Sila le na alu i le palota e fia alu i le dialysis o le a le totogi e totogi ai? E tutusa ma le rate o le sitiseni lea na palota i Samoa nei pe alu pea i le \$600? E faapefea isi benefits ma mea faapena? E oo lava i le tulaga o tatou tai miliona. A tatalo mai le sitiseni mai fafo o lea sa palota, o lea na ou palota ma lagolago ia te oe lou Taitaifono, aumai sau vaega e fesoasoani i lou aiga i ina. O le a le tulaga o mea faapea?

Lau Afioga i le Fofoga Fetalai o tulaga na o le economic implications o le mea lenei, leaga e le alofia e pei foi la ua tatou iloa uma ia Niu Sila e sili atu loa i le 6 masina o e toesea ma Niu Sila ia forfeit loa lau benefit. Ua tatou iloa uma lava, o tatou aiga e omai e tafafao e iloa loa o le a uma le 6 masina e vave lava ona toe oso i Niu Sila ne i meaane ua afaina. Pe tasi lena o aiaiga mo se faataitaiga. Ma o mea faapea e ao ona silasila mamao i ai, silasila mamao i ai le tatou Palemene aua o le mea lenei, o le mea e le manuia ua see lo tatou vaa ae toe faapea ane "oh hang on" ua fai lava si toatele o le vaega lea. Ioe. Ae lelei le taufai tapena ia tapena mae'ae'a ona fesili lea; se i vaai ane lava i le Hansard po o ai uma faipule na i ai i le taimi lea na o latou faia ai le Tulafono lea? Ioe. Ia tatou vaaimamao, vaaimamao i ai, o mea ia. Ae pei ona ou fai atu o le agaga ia o le resitala online ou te matuai ou lagolagoina, peitai e i ai nai galuega ia e ao ona silasila muamua i ai ma tapena i ai lo tatou sa. E pei o tulaga ia e taumafai atu ai.

Ma le mulimuli, e ese lava sou lagona i le mea lea ua tulai mai e faapea o IT lava a Matagaluega lea ua design e i latou ma develop e latou le system. O si o'u popolega, e faamalulu atu foi lau Afioga i le Minisita e ana le Matagaluega ma le tulaga lea, ia te a'u ia, I prefer se system ese ae le o se system e design lava e IT. Aisea? Confidentiality ma tulaga o le talitonuina aua a alu alu ae crash le tatou system, o ē na faia le system ia e tulai mai foi i latou, tulou. Fai foi le faatusa a le Afioga i le Tamaitai Palemia ia e manaia foi lana faatusa i le taavale, e tatau ona faatau sana taavale fou. A o si au foi tamai faatusa i le mea lea, le mea lea o le aumai o IT e develop lava e latou ma design le system, e foliga mai ua omai lava pagota fau e latou le falepuipui. E latou te iloa uma lava vaipanoa i auala lafi ma auala i totonu o le falepuipui tulou, na o se analogy o lea e avatu. E pau lava lena o lou popolega. E pei e tulaga faapena ae a pe a faapea, o lagona o lenei itumalo, ia faataitai muamua le tatou faiga lea online i totonu o Samoa. Tatou vaavaai e trial ai i ina pe i ai nisi mea e toe silasila mamao i ai, aua e i ai nisi Tulafono a faaletonu atonu e faigofie ona toe teuteu aafiaga. Ae a faaletonu le tatou system lenei ae ua on le Faiga Palota, lea na saunoa le Afioga i le Tamaitai Palemia, o le taua lena o le Tulafono lenei leaga e faamoemoe i ai i latou e filifilia sui o le Maota lenei. A alu alu la ae faaletonu mai le system lea ona faapefea lea?

Lau Afioga i le Fofoga Fetalai, o nai tuualalo ia o nai motugaafa foi a lenei itumalo. Ma le faaaloalo lava.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Malie le sui usufono se i... Ia tulai mai lau Afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: E leai se agaga e faalavelave i le saunoaga matagofie a le sui usufono, e tele lona itu taua i le momoli mai o le feau, ia nofouta i ai le tapenaga o le Tulafono. Faafetai. Ae na ona faapulapula laitiiti lava pei ona fai atu pea le Faigamalo, o lo o agai mai le tele o aiaiga e faaiu ai atugaluga nei. Le implication lea ua e saunoa i ai, ou te tautala leaga o le mea lea sa ou manao e faaali. E toatolu, toafa ou aunties e mai Niu Sila ua foi mai iinei ae tala le latou penisione e tai \$2,500 i le \$3,000 i le masina ua nonofo iinei. O le mataupu la, e two ways le aluga o le mataupu. A faapea nei o le paia ma le mamalu o tagata uma lea ua omai mai Niu Sila resitala i le palota ae foi mai i nei, o le fia selau afe o la e penisione i Niu Sila e sau i nei. Le tupe la lena lea tatou te manatunatu i ai that's a new revenue mo le atunuu ona o le penisione lea ua sau iinei ia tatou. O le atugaluga lea faapea i le toatele o tagata e omai tafao le tatou penisione laitiiti lea, seiloga e te afio mai i nei ona faatoa e entitle lea i le mea lena, ioe ma o itu taua e tatau ona faamanino. Ina ne i te i ua mafaufau atu e pei o le tulaga lea na ou tau tulai atu ai ananafi, a omai nei tagata mai fafo se ua fufula le Lola, ua tatou fefefe e omai tagata i totonu o le atunuu.

O le agaga ma le faamoemoe o le Tulafono, apo mai, faamaopopo mai le atunuu, talia ma amanaia lo latou sao ia manuvao, omai i inei tatou nonofo palota toe foi mai. A o tatou vaai nei i le trend lea ua alu nei na ona aulia lava o le matua 70 i le 80 tausaga viga loa i le fanau, fau le fale i Samoa o au ua ou toe fia foi i le atunuu. O le tapenaga la lenei ua amata atu.

O le mea foi lea na taua ai le tulaga i le faamamatoto, ia o lea ua uma ona tatou talanoa a foi mai e nofomau i inei ona alu lava lea i le tau lea tatou te i ai. E leai se aafiaga tele i le tulaga lea e atugalua ai le sui usufono. E na ona ou faapena atu, leaga e alalua le mea e sau alu atu ae taua le fautuaga ua molimoli mai e matimati ai teuteuga ia ua amata na tapena atu. Malo saunoa.

FOFOGA FETALAI: Ia malo faafetai saunoa i lau Afioga i le Minisita. E talitonu foi o lea ua maea foi le saunoaga a le sui usufono. O le a se isi mea o...

Susuga MAULOLO TAVITA AMOSA: Leai faafetai lava. Ae pei o le agaga tonu lena ae pei o le agaga lea e fai atu i ai, silasila i numera, silasila i le numera pe gafatia. Maimau e, pe ana faapea e aumai uma tulaga na tatou te silasila uma i ai ona faigofie lava lea ona fetuunai. A mea o le ute lena o faigamea o le toatele e omai i inei. A o nai popolega na, ia ne i mea ua tatou vavevave i se isi tulaga ae faaletonu ai se isi tulaga. Ae ui i lea, faafetai i lau Afioga.

FOFOGA FETALAI: Malo. Faafetai mo le sao o le sui usufono mamalu. Ia, atonu o lea foi ua sausaunoa foi le Minisita ma taua foi nisi o fautuaga ua tuuina mai. O le mea lea, malo lava faafetai mo le tofa.

Ia, tulai mai le sui usufono mo Aana Alofi 2. O lou avanoa lenei, sosoo ai lea ma le sui usufono mo Safata 1.

Afioga AIONO TILE GAFA (Aana Alofi 2): Ia, faafetai i lau Afioga i le Fofoga Fetalai mo le avanoa o lenei foi usugafono o si nei foi itumalo e tulai atu ai ma le faaaloalo e fai foi so matou manatu aua foi le tatou galuega o lenei aso ma le Tulafono Tau Faaofi. Viiava lava le Atua i Lana taitaiga.

E faatalofa atu foi i lau Afioga i le Fofoga Fetalai ma le Sui Fofoga Fetalai aemaise foi le paia o le Maota. Le afio o lau Afioga i le Tamaitai Palemia ma le mamalu o le Kapeneta. Lau Afioga i le Sui Palemia ma le mamalu i le nofo a Minisita Lagolago. Ia, afio atu foi le Taitai o le Itu Agai, Sui Taitai ma le mamalu o sui usufono o le Maota, aemaise foi o le papaaao mai o le paia o Ofisa Sili o Pulega o Matagaluega. Malo le galulue i Matagaluega ma Faalapotopotoga a le Malo o vae ma lima i ai le tautuaina o le tatou atunuu aua ana atinae.

Ia lau Susuga i le Failautusi o le Fono ma le Ofisa, malo le galulue, malo mo lenei aso. Faafetai le faaaloalo aua le tausiga o le tatou fono ma le galuega.

E le toe ta i Utumaaui so matou tulai aua se leo foi aua o Samoa ua taoto ona upu... ua taoto foi a alaoo ona paia ma mamalu mai lava i tumutumu mauga

seia oo i se toe tagata. Le paia i le Tafatolu o le faigamalo aua le Kapeneta ma le Faamasinoga aemaise foi le Palemene.

E ese le matagofie o tulaga o lo o tatou tapisa ai nei. O le Tulafono o le Faiga Palota, e teuteu ai le Tulafono o Faiga Palota leaga o le tasi lea vaega o le tatou omai i nei. Tulou le paia o le Maota, o le alafua lea ma le faitotoa lea e saili ai sui usufono o le Palemene aua upufai o le tatou atunuu. O lea ua tatou faasoa ai nei. Faafetai foi i le Afioga i le Minisita. Faafetai i le Afioga i le Ofisa Sili o Pulega o le Faalapotopotoga.

O le faatulai mai o lenei Teuteuga, e tele lava ona taua. Tatou te vaai i le tuanai ae tatou te tepa taulai foi i le lumanai. O le mea taua i lau faalogo i le tele o saunoaga ma fautuaga, o fautuaga ma saunoaga ma timaiga e tapue ai se mea ina ia matua lelei atili ma atoatoa. O lau faalogo i le tatou Aso Gafua, e lagona lava le faafetai i le Atua ona o le saunoaga faamalamalama a le Afioga i le Ofisa Sili o Pulega. O se saunoaga a se tagata ua matua atoatoa lona talitonu, lona faatuatua i le mea lea. Ua talitonu i ai, o se galuega e leai sona toe sese pe a faatino. E leai foi se mea e toe popolevale ai le tatou atunuu i faatinoga o le Tulafono lea. Ioe, o le agaga lea, e ui lava ina siisii foi finagalo i lona aso ae sa mautu lava le saunoaga a le Afioga i le Ofisa Sili o Pulega. O lea e momoli i ai le agaga faafetai. O lea ua saunoa manino lau Afioga i le Minisita e faamalamalama tulaga uma. O lea ua agai atu foi fautuaga, o fautuaga e faaleleia atili ai. Ia, o le agaga faafetai lea. E le i faigofie le Tulafono ae o ai ia o le Tulafono lenei. E leai lava se faiva e asa ma se maumau. O le a se mea tatou te taumafai ua tatou mautinoa, e i ai lava lape o galuega. E i ai lava faafitauli ma mea tutupu leaga e leai se mea e atoatoa i lalo le la. Ioe. Ae faafetai i le tele ma le anoanoai o le sosia ma le tamaoiga i le tofa tatala o le Maota e e faufau ai le Tulafono. E leai se toe foi i tua pei o le sau i le va i saunoaga a sui usufono mamalu. O le a lava so matou taumafai atu, a o tu ia ma aga o le va feagai ai o le Maota lenei. Ioe. O le tuualalo a le Itu Agai ma nisi o sui usufono mamalu o le Palemene, o lona e i ina le tofa, tatou te tau ai i le tini, tatou te tau ai i matagofie aua le faatali mai a le atunuu po o a tatou galuega o lo o fai nei. O lea e momoli ai le agaga faafetai.

O le tulaga lea sa matele i ai saunoaga, o le faatinoga o le fuafuaga. O le system. O auala o le faatinoga. Ioe. Ia lona ua avatu. O lona ua avatu i lau Afioga. Ioe. O tatou tagata o lo o i fafo. Pau lava lea o le taua, resitala mai i luga o auala faatekonolosi faaneionapo. Malaga mai i Samoa faataunuu ma faamaea ai sia fuafuaga. Toe foi, ono masina, sau e faataunuu lana palota. Ioe. O le tulaga lona e avatu ai. Silasila totoa i le atoaga o nei mea lau Afioga, silasila totoa. O lea e pei ona taua i le saunoaga a nisi o le Kapeneta ma le mamalu o le Maota o le a fula le tatou lola, tulou. Ae faapefea nei, o le a se tulaga e oo i ai pe afai e sau e fai le resitala, sau e palota tasi lava le taimi. Ioe. Ae oo i le isi taimi ua le toe sau. Pe fai foi ae le sau e faataunuu le mea na manao ai. Ou te iloa o le mea lona a le tagata lea ua ta... A o le fula lea o le lola. O le avanoa lea i lau Afioga i le Fofoga Fetalai e timata ai pea, e follow up ai pea le lelei o le tatou lola. Ioe, o le galuega lona ou te talitonu o le galuega lona o le tatou

ofisa a le Matagaluega. E uma loa le vaega lea la fai nei ma tulaga o le faaleleia o le tatou lola. O nisi e mulimuli mai ou te iloa o le galuega lena o le a agai i ai le tatou Faalapotopotoga e faaleleia atili e aua ai ne i toe faaitiitia ai nisi tulaga e toe aliali mai.

O lea o loo taoto le Lipoti a le Komisi o Faiga Palota. O lea foi ua uma ona taoto ma folasia i le Laulau a Fono le Lipoti a le Komiti o le... latou sa auiliilia le Lipoti a le Komisi. Atonu se taimi ona tatou oo lea i ai. O nisi ia o vaega o lo o i ai i totonu o le Lipoti lea peitai ane o lea lava ua aumai faanatinati vaega ia ona o le finagalo o le Malo ina ia faanatinati aua le palota lea o le a sau nei. Ioe. O se tulaga e tataua ona silasila i ai. Ioe. O le a le taimi e talanoa ai le tatou Lipoti lea atonu o le a soalaupule ai nisi o vaega ma faaitiitia ai foi nisi o Komisi e toe tulai mai aua o lea o le a matua atili ai ona lelei lea vaega tele aemaise lava le tulaga lea i le tatou lola.

Ia, e pei o tulaga na e ao ona toe faamanatu atu i lau Afioga i le Minisita aemaise foi le Malo ina ia agai pea i ai le silasila mo le tatou Tulafono lenei. Pau lava o le tulaga, o nisi vaega uma e pei ona tatou vaavaai foi aua o tatou itumalo. Ia, e talitonu e galulue faatasi lava. O la e faafofoga mai si matou itumalo ma le tapuai mai i galuega, ia, tatou te agai e galulue faatasi i le mea ua finagalo ai le Maota e ala i le tatou Tulafono.

Ae momoli atu le agaga faafetai e tusa ai ma le faatulai mai o lenei Tulafono ia ina ia fai se suiga, se suiga lelei. Ia, aua le tatou faiga palota ma le sailia o sui usufono mamalu o le Palemene aua le isi palota o le lumanai. Lau Afioga i le Fofoga Fetalai pau ia o se lagona, pau lea o se manatu e tulai atu ai. Ae ia faamanuia e le Atua i lau Afioga, manuia foi le Palemene. Ae ola so matou leo ma le agaga faaaloalo.

FOFOGA FETALAI: Malo. Faafetai. Malo saunoa i lau Afioga i le sui usufono mamalu mai Aana Alofi 2. Faafetai mo le tofa aemaise foi o fautuaga mo le faaleleia atili o le tatou Tulafono Tau Faaofi. Malo faafetai saunoa. Faafetai mo lou sao. Ia o lou avanoa lenei Safata 1, le sui usufono mamalu.

Afioga LEAANA RONNIE POSINI (Safata 1): Faafetai tele i lau Afioga le Fofoga Fetalai e maua ai foi se avanoa o lenei itumalo e faaali ai se manatu i le tatou Tulafono Tau Faaofi.

Ia, e faatalofa atu foi i lau Afioga i le Tamaitai Palemia o le Kapeneta, o Minisita Lagolago, aemaise foi lenei itu i le Taitai o le Itu Agai ma le Sui Taitai ma le mamalu o le Palemene.

E faatalofa atu foi i Ofisa Sili o Pulega o Matagaluega, o outou lava o lo o tua atu i ai le tatou Malo. Ia, le tapuaiga a Samoa malo le tapuai, aemaise foi le matou itumalo, ia faamalo faafetai tatalo e maua ai foi le malosi o lo outou sui usufono e faaali ai se manatu i totonu o le Palemene e ala i ana Tulafono.

Ia, ae talitonu e fai ia so matou manatu i le Tulafono ua taoto nei i le Palemene. Ua manino ma atoatoa le Tulafono. E talitonu foi, o nai manatu o lenei itumalo, o le maitau lava lea ua manino ma faafofoga le tatou Palemene o le Tulafono

lenei o lo o aumai o se Tulafono Faanatinati. O lona uiga, i le maninoga a le tatou Palemene, o se Tulafono ua vave ona manaomia i se taimi e vave ona faatino ai ma faanatinati ai le faatinoina o le Tulafono ona o se taimi ua maitau atu ua puupuu le taimi, lea ua ala a ona faanatinati le tatou Tulafono.

Ae muamua lava ona ou oo i mea e taua i lou lava lagona aemaise o lenei itumalo, o le system lea o le a faaaoga. Aua na tau fesilisili foi i nisi o tagata e i ai le potu faapitoa i le system lea o le a agai ai tatou ma le system tuai lea ua i ai. E i ai foi le latou lea mau, e mafai foi ona toe upgrade le system tuai ma tulaga faapena. O le popolega o lenei itumalo, aua ou te iloa o le tala lea o saunoaga i totonu o le Maota lenei. O le popolega i le system tuai lenei, ne i oo i le taimi e faatino ai le faamoemoe o le atunuu i le faiga palota ae faaletonu mai. Ae i ai le talitonuga o lenei itumalo, e sili atu lona faaletonu pe afai e faaletonu le system fou lea. Leaga o mafuaaga o la e manino lava. E lelei le system tuai lea ua faaaoga faafia, ua tatou iloa foi faafitauli. Ua tatou iloa foi mea e tutupu mai ai. A o le faaaoga o le system fou lea e le i faataitaia. E tele lava le faafitauli e ono tulai mai ai. A palalū la i le taimi o le tatou faiga palota, o le a la le tatou tali? O le a le tali a tatou i ai pe a faaletonu le faiga palota a le atunuu a ua faaletonu le system fou lea ua aumai?

Leai, e momoli lava le agaga faafetai tele i ē foi o lo o i totonu o le Matagaluega i le sailiili, sailiili e fai le polokalame fou lea e faaaoga e fai ai le tatou resitala fou. E le o se mea leaga le mea lea, o le mea e taua. Ae o le popolega lenei, leaga o le tatou Palemene, tatou te tilotilo i luma, tatou te agai foi, aua o lea ua tatou iloa e i ai lava faafitauli i mea uma, e tulai lava faafitauli. O le a le tatou tali? E tapena foi i ai tatou, e tapena i ni faafitauli e tulai mai i le aso e tapena ai le Faiga Palota e tulai mai ai ni faafitauli. O le ala lenei lea e taumafai atu ai, ia silasila totoa i ai le tatou Faigamalo.

O lona lua, o le mea lea o le resitala lea e fai aua o lea e tau maitau atu ua aumai fuainumera nei e tusa ma le 100% e ono siitia ai le resitala o tagata palota. E ono 100% le siitaga po o le sili atu foi tagata fou o lea o le a resitala i totonu o le tatou Palota lea. O lea ou te maitau atu o lea ua manino foi e uma ona resitala mai luga o le online ae toe agai uma mai lava i inei e pue lou ata ma fai fingerprints. O lona uiga e tele foi lea galuega. Ae i ai foi la lou manatu e tuualalo foi i le Malo, e le tatau, le tatau ona tuu i totonu o le Lola Palota pe a le maua uma manaomiaga ia e manaomia mai e le Ofisa o le Faiga Palota. Leaga o lea o le a resitala mai fafo, tuu loa i totonu o le itumalo, ae uma ifo ua le oo mai e fai le mea lea o le pue o le ata ma le fingerprint. O lona uiga, o le Lola lea sa taumafai e fufulu le tatou Lola, tulou le Palemene, ae o le a matuai faateleina ai la le tele o le gaogaosa lea i totonu o le Lola.

Ae i ai lau fautuaga, seiloga lava ua ua e oo mai e fai le fingerprint lea ma pue lou ata faatoa tuu lou suafa i totonu o le Lola, ua mautinoa ai ua uma lau resitala. A lea la ua tau matau pe afai o lea e faapea o le a resitala mai, o le ala foi lenei o le a tumu ai le Lola.

O le isi mea lau Afioga i le Fofoga Fetalai, o faafitauli ia. A o le mea lea ou te maitau foi i le resitala lea ma le tatou Tulafono lea aua o lea foi ua maua atu i le Faigamalo ma le tatou Malo e i ai isi Tulafono ia e mulimuli mai, isi Tulafono

e toe teuteu ai lava Tulafono ia. Aua o le Tulafono pito sili lava lea na ou faatalitali foi i ai aemaise foi le matou itumalo, o le toe vaevaeina aua o lea ua manino e toe vaevae foi itumalo.

Tofa Hon Leatinuu Wayne Soialo (Minisita mo Faalapotopotoga a le Malo): Lau Afioga i le Fofoga Fetalai...

FOFOGA FETALAI: Malie le sui usufono mamalu se i tuu atu le avanoa i le Afioga i le Minisita o Faalapotopotoga a le Malo.

Tofa Hon Leatinuu Wayne Soialo: Faafetai lava i le manatu foi o le sui usufono na tulai mai, ia e manaia foi le finagalo. Ae ou te talitonu o le faamalamalama lea na faamalamalama ai i le tatou Pre-sitting seiloga lava e atoa uma biometrics, atoa uma ona fai au ata ia ma au... faatoa e alu lea i luga o le Lola. O lou malamalama lene i ai i le mea sa faamalamalama mai. O lona uiga, po o le a lava la lou resitala mai online e le mafai lava ona tuua lou suafa i luga o le Lola seiloga lava ua uma ona faatino. Ou te talitonu e faapena foiinei i Samoa, a e alu atu foi e resitala lou suafa ae le faia lava mea ia, ou te talitonu o lea e faalogologo mai le Susuga foi i le Komesina o Faiga Palota, e le mafai lava ona tuua i luga. O lona uiga e invalid. A invalid lona uiga e le faaogaina. Ia pei o le toe fesoasoani atu lea i lau Afioga foi i le sui usufono o lo o saunoa mai, faafetai.

FOFOGA FETALAI: Lau Afioga i le sui usufono mamalu faaauau mai le saunoaga.

Afioga LEAANA RONNIE POSINI: Faafetai tele lava, O le agaga tonu lene lea na taumafai atu i ai leaga e i ai lava nai popolega i le mea lea. O nai popolega e le gata i le fou o le system ae afai e tuu i ai i totonu e le i maea le mea lea i totonu o le resitala. A foi lea pei ona taua e isi tagata e potu faapitoa i mea ia tau IT, e mafai ona hack le tatou Palota ona aveseina ai lea o faaiuga o le tatou... O le aafiaga tele lene lea e tau popole atu i ai i tulaga faapena. Ae afai o lea e faamanino lelei e le aveina lava i totonu aua o le mea lea fai mai, e resitala mai i le Itumalo lea o le a resitala i ai ma ave i ai i totonu. Ae afai e moni la le faaaliga a le Minisita, ia ou te talitonu o se mea lelei lene.

Ona oo lea o sau tala i le tulaga lea o le Palota i le tele o tatou tagata ia e palota mai. O se mea lelei tele le mea olea o le palota mai o tatou tagata mai fafo. Ae o le agavaa foi o le mea lea o le sitiseni, lea e tau e tatou o le first generation ma le second generation e agavaa i le mea lea o le sitiseni. Ae i ai le popolega aua e i ai le... ia o se faataitaiga faigofie lava, o matua e Samoa le tina ae o se atunuu ese le tama ona fanau mai lea o le la alo e afa le Samoa, mo se faataitaiga o se Initia, afa le Initia. Ia toe nofo le afa Samoa lea ma le afa Initia lea nofo ma se isi Initia maua mai ua kuata Samoa lea e i ai lea. A o nei tagata e le i oo mai lava i Samoa e matua le malamalama lava i tatou Itumalo, a o lea la o le a sau e resitala aua o lea e agavaa i le sitiseni. A o lea foi e fai mai le Tulafono e faailoa le mea na e nofo ai, a o lea e oo lava i lona tama ma ona matua e le i

nonofo lava i Samoa, e le i oo mai i Samoa. A o lea ua sau le tupulaga lona lua, e oo mai e le malamalama atoa i le tatou atunuu, ae leaga o lea ua agavaa i le sitiseni. E le mafai ona tatou taofia le mea lena. E i ai la lou talitonuga, palota fai pogisa le palota lea a tatou aua foi e le malamalama nei tagata. E le mafai ona tatou aveesea le sitiseni ma le tagatanuu Samoa, a o le toto la e i ai o le kuata Samoa la e i ai ae ua tolu kuata i le atunuu ese. Leai leaga o mea e tutupu e le mafai foi ona tatou toe o ese ai ma le tatou Tulafono o le Sitiseni Samoa.

O lona uiga o le tatou Palota lea o le a fai, palota e tagata ese, tagata e le malamalama e le iloa tatou lea e tautua i le 24 itula i totonu o itumalo. O le a foliga mai o se Palota e alu i taaiga, a lelei a la le taaiga foi lele e te alu ai ia o lau palota lena e te palota i ai. A o le tatou Palota....

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Ia, malie le sui usufono mamalu, se i tulai mai le Afioga i le Minisita o Faatoaga.

Susuga Hon Laauli Leuatea Polataivao Fosi: Ina ne i loloto tele atu le faaaloataua a le sui usufono. O la e faafogafoga mai le paia ma le mamalu o Samoa la e i le lalolagi atoa o le latou entitlement lea. O lea o le a amata lava ona vaevae, vaevae, vaevae, iu ane lava ua sese atoa le Tulafono, taatia mai o lea e faasolosolo atu le tapenaga o le mea tonu lava lea e te atugalua i ai. A foi o lea e faasolosolo atu leaga o lea tatou te finau nei seiloga e omaiinei faatoa fai le resitala, seiloga e omai iinei faatoa palota. O lea e tapena uma lava atugaluga ma... E tutusa lava le resitala o le tagata iinei online, seiloga lava e sau e oomi lona lima faatoa i totonu o le Lola ma le tagata la e resitala mai Niu Sila, i le taimi lenei. A o le mea lea e te atugalua ai i le qualification o le tagata la e i fafo, lea e tapena e le Minisita le Tulafono. Tailo. O le a le Tulafono o le a aumai? E le iloa pe na o tagata na fananau iinei e amata ai, tatou te le iloa. Ae ina nei toso le lauu felefele ma mafaufau ai tagata, Oh tafefe ia Samoa o le a puleesea. A foi lea e i ai le atugalua... O ai e faalogo i ai le Palemene o Samoa? Le upu lena lea ua alu, fefefe ne i palota mai fafo e puleesea le Malo o le atunuu. E le o le agaga lena, o le agaga, apoapo mai le atunuu, fai le faaaloalo ma le latou aiatatau ua leva ona tautua. Na saunoa foi nisi ananafi, e sili atu le tautua a le Samoa lea e iinei nai lo le Samoa la e nofo i fafo. Talofa e, aua tatou te manatu faapena leaga tatou te le iloa le mea la e fai i le ao ma le po e tagata la e aitaumalele, 24 itula, le tautua lena lea e tautua ai aiga, nuu ma le ekalesia iinei aua la ne i tatou tavavaea le mea lena. E taua le tautua a latou mai fafo. Ae ua ou manatu ne i te i ua e loloto tele ma toso pea le mea lena o le a puleesea le Palemene. E le tupu, e le tupu se mea faapena i le Tala Faasolopito o Samoa, e puleesea seiavagana ua tatou toe oo i faiga faa-kolone ma mea sa pulea ai tatou ae tatou te le i Tutoatasi.

Ae taatia maia ia Minister o lea e design atu le auala e mafai ai ona palota mai fafo ona o le amanaia o le latou aiatatau. O sau fesoasoani atu lea i lau Afioga i le sui usufono.

FOFOGA FETALAI: E masalo o lea ua faafofoga le...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o au sa ou manatu e tu mai pea le Minisita e faamatala. O le a atili ai ona confuse tagata i le tu mai o le Minisita e le o se Minisita o le Faiga Palota, aemaise lava le upu lea, faatali mai se i fai faasolosolo. O le a le mea ua fai ai faapea Tulafono? E pasi lea mea ona faatali lea se i faasolosolo mai. A na aumai atoa le Tulafono, e leai se pisa o le Maota lenei.

FOFOGA FETALAI: Ia, o le... Ia se i tulai mai lau Afioga i le Minisita.

Susuga Hon Laauli Leuatea Polataivao Fosi: E manatu e le faia se faafinauga i lea upu. Tuilaepa, o lau gagana lava lenei sa e gagana ai i aso ia, o le faasolosolo. E le mafai ona aumai uma o lea faatoa uma le Komisi Suesue na aumai ai mea ia e tapenapena atu. E le mafai ona aumaia i se taimi se tasi, taatia maia i faiga faavae a lenei Faigamalo fou. Pe ou te tu atu, o au o le sui o le Kapeneta, it's a collective responsibility matou te fesoasoani i le Minisita lea e tali. O le faamalamalama lenei, ua uma le taimi lenei na o le toatasi lava le tagata sa tautala, uma.

Susuga Hon Tuilaepa Fatialofa Auelua Sailele Malielegaoi: O le mea e fia faasao..

Susuga Hon Laauli Leuatea Polataivao Fosi: A o le agaga lenei e tataua ona faamalamalama atu.

Susuga Hon Tuilaepa Fatialofa Auelua Sailele Malielegaoi: O le mea o le collective responsibility, e o faatasi le Kapeneta i se tonu e fai. Ae le o le fai o le tonu e le Kapeneta ae alu ia lea ese le mea e tu ai.

FOFOGA FETALAI: Ia o lea ua maua le finagalo, ae manatu foi o lo o fai lava le tiute o le Kapeneta latou ia e faapena ona felagolagomai aua lava le faamausaliina o le tatou Tulafono o lo o taumafai e tau faaofi. O le mea lea, ia malie... ia se i tulai mai...

Susuga Hon Laauli Leuatea Polataivao Fosi: E manatu o le a le toe faia se faafinauga lau Afioga, e molimau mai le atunuu. E tasi lava le auga na fai ai le Tulafono lenei ia taoto i lagatonu le faamoemoe o le Minisita ma le Kapeneta. Malie Leaana o si au fesoasoani atu i lau Afioga, ae ua oso faalava mai foi le toaina e faaleaga le mea na ou taumafai atu ai.

Susuga Hon Tuilaepa Fatialofa Auelua Sailele Malielegaoi: E le o se mea e tau faaleaga, e avanoa matou i se mea e fia faasao i so o se taimi. O le mea la lea ou te fautuaina foi le Minisita o lo o tulai mai, e matou te fia faalogologo i le Minisita e ana tonu le Tulafono.

FOFOGA FETALAI: Ia, e talafeauga lelei foi lava ma le taimi o lau Afioga i le Taitai o le Itu Agai, aua e faamuli atu lava ia te oe ia ona aumai ai lea o atugaluga ia ua e saunoa i ai.

Afioga Sulamanaia Fetaiai Tauiliili Tuivasa: Mo le faasaoina o le sui usufono mamalu o lo o saunoa, e puupuu lava lata fesili ona o lea e saunoa le sui usufono i le tulaga lea pei e maua e sao lelei lava o lea e le i aumaia i totonu, mo mea o boundaries. O le fesili la i lau Afioga, po o e popole pe a aveese le itumalo la e i tua ia te oe, pe a aveese Salamumu. Po o le mea o lou popolega ne i te i ua e alu lau tagata Salamumu ae sau e le toe alu atu Salamumu. Pei o Salamumu lea e te popole i ai lau Afioga i le sui usufono?

FOFOGA FETALAI: O lea ua maua atu lau faauilavea. A o lau fautuaga i le sui usufono, e le o talanoaina se Tulafono faapena. E manatu lava au ia agai tonu pea lou finagalo i le tatou Tulafono Tau Faaofi.

Ia tulai mai le sui usufono mamalu e faaauau le saunoaga.

Afioga LEAANA RONNIE POSINI: Lau Afioga i le Fofoga Fetalai, o lea ua tulai mai le Afioga i le Minisita o Faatoaga ma toe faamanino mai. O lena tonu a lou manatu, o lou manatu lena, e faapalota uma mai i le agaga lea e tau fai atu. Ae ou te le o fai atu e puleesea. O le uiga o lau tala lea e tau fai atu e faamanino pe afai e le o maua lelei e lau Afioga i le Minisita. E faapefea tagata ia na ou taua, lea ua i ai sitiseni ia ae le i oo mai i Samoa. Ae o le taimi e fai ai, aua e resitala tagata nei, e le mafai ona aveesea. E pei o lea ou te au i le mea lea, e le mafai, le mafai ona tatou aveesea pe afai e te sitiseni Samoa e tataua ona e resitala. A o le mea e autilo mamao atu i tua i le mea e tulai mai. Ae leai se agaga faapea o taumafai e... ia o ai e... o tatou aiga uma nei e aoga mai uma mai ia tatou i faalavelave o tatou aiga. E leai se agaga faapena, pei ou te tau faalogo atu pei o lea e te tuuaia au e le aoga le tautua a tatou aiga la e i fafo. Leai. O ai se isi e le amanaia le tautua a nai o tatou aiga. Ae o le mea lena, a tupu mai nei, aua e tupu le mea lena e tele tagata e le i oo mai i Samoa a o lea o le a resitala. Ae o le a resitala toe palota. O fea e fai i ai lana filifiliga? O mea na e talatala i ai i tua le manatu aua o mea e tutupu leaga o lea ua aafia i le Tulafono. A o lea la foi ou te tau matau i le mea na ou fai atu ai, o lea ua aumai le Tulafono lena o le resitala loa a o lea foi tou te saunoa mai e toe vaevae Itumalo. O lona uiga i lou talitonuga o le mea lena e tataua ona fai muamua, vaevae itumalo ona toe resitala lelei ai lea. O lona uiga a uma ona vaevae, oi ua uma ona resitala faatoa sau le Tulafono e vaevae ai Itumalo, toe resitala foi lea. O lona uiga e oo atu lava i le 2027 o tau fai lava le mea lena, leaga o lea e saunoa outou le Faigamalo e toe vaevae itumalo a o le mea sa tataua ona fai muamua.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Ia malie le sui usufono se i tulai mai le Minisita.

Susuga Hon Laauli Leuatea Polataivao Fosi: Ina ne i avea lo'u tulai soo atu e tatau lava ona malamalama le sui usufono mamalu. O le tulaga lea e taumafai atu ina ia taoto atu o le kiligiina o le Lola lea tatou te talanoa ai e aveese tagata feoti aveese tagata e le o i totonu o se Itumalo. E amata iinei. O le resitala lea e te atugalua ai ua uma ona ou faamalamalama lelei e le Minisita ma le Ofisa Sili o Pulega o le Matagaluega o la e le i faia criteria tonu o le tagata sitiseni lea e te atugalua ai. E le faavalevatea le resitala ma le tatou Ofisa e vaai atu lava o le tagata e le tatau ona qualify ae fai lava, ae pei ona fesoasoani atu i le tulaga ua tatau ona amata a o le resitala i isi mea ia e te atugalua ai e talitonu o lea e tapena atu. Ia ma le agaga faaaloalo.

FOFOGA FETALAI: Se i tulai mai le Minisita o Faalapotopotoga a le tatou Malo.

Tofa Hon Leatinuu Wayne Sooialo: Ia lau Afioga i le Fofoga Fetalai pe maua se avanoa.

FOFOGA FETALAI: Ia saunoa.

Tofa Hon Leatinuu Wayne Sooialo: O le agaga lava ia e le o le Faigamalo lenei e ona le fautuaga lea o le vaevaeina o Itumalo, o lea tou te silafia o lea sa i ai le tatou Komisi o Faiga Palota o latou e ona le fautuaga lea na aumai i le Faigamalo mo le vaevaeina lea na ave i le Komiti Faapalemene. O le taimi lenei o lea taatia ou te le iloa pe taunuu pe leai. Ia, o le finagalo lena o le Malo faatoa maua i le taimi e aumai ai le Tulafono lena pe oo le vaevaega lea na tatalo mai ai le Komisi o le faiga lava lea. A faapea lava e uma le Faiga Palota fai le Komisi, uma le Faiga Palota fai le Komisi, a o le tele lava o fautuaga a le Komisi e le taunuu a o lenei taimi lea ua aumai i le tatou Komisi lea foi ua aumai i le tatou Komiti lea foi la ua aumai le Kapeneta, ae tatou onosai atonu masalo pe faasolosolo atu, e tai pei o le saunoaga lea sa iai. O lea foi la a faasolosolo atu i le Tulafono lea. Faafetai lava.

FOFOGA FETALAI: Ua ou manatu le sui usufono mamalu ua maea foi lou taimi, ae tulai maia faauma mai le saunoaga.

Tofa Hon Tuuu Anasii Leota: Lau Afioga i le Fofoga Fetalai...

FOFOGA FETALAI: Se i malie lava lau Afioga i le sui usufono mamalu se i tulai mai le sui usufono o Siumu.

Tofa Hon Tuuu Anasii Leota: Ua ou tulai atu e fai atu se fautuaga i le sui usufono, e foliga mai o lea e i ai lona popole, popole ia sui usufono, ae o lau Afioga e le mafai ona tatou iloa se mea moni pe a le faataunuaina le mea lea. Aua tatou te fefefe i le mea e le i tupu. Ou te fautua atu tatou o ia e fai le system lea e fail loa le system pe crash ia e le mafai ona toe fai se palota. O ai la e faia

se isi tonu? O lau Afioga ma le Palemene lenei e tatau ona toe extend le tatou term i le isi 3 tausaga ae se i fai le system. Ma le faaaloalo.

Afioga Hon Valasi Luapitofanua Toogamaga Tafito Selesele (Minisita o le Soifua Maloloina): Lau Afioga i le Fofoga Fetalai...

FOFOGA FETALAI: Se i tulai mai lau Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: Masalo e i ai le mea lea e maitauina pei e gasegase sui usufono. O le ala tu atu lea o le Minisita o le Soifua Maloloina ina ia fofu malie finagalo o sui usufono mamalu aua le popole. Silasila Afioga i sui usufono mamalu ma le Maota lau Afioga i le Fofoga Fetalai, o le suiga o le olaga ma le soifuaga e le i faapea na faatoa sui nei ina ua tulai mai le Malo nei. E tele mea na sui. Ae silasila i le suiga matagofie ma lelei sa luga lalo le suiga o le auala e Tuilaepa vaeatu le... O le a le mea na i ai? Na solo tetee tagata a o le a le mea lea ua i ai nei? Ua matua selau pasene.

O suiga la nei lea e popole ai sui usufono o le la Itu e le o ni mea fou. A leai ni suiga, ua tatou vaai i le afua mai o telefoni feaveai, a fua i aso ia, e tasi lava le leitio i le nuu e o uma i ai tagata e faalogologo i ai. E tasi le telefoni. Ae a le vaitau lenei? Ua tatou vaai i ai ua i ai telefoni feaveai. Sa le i faia i o tatou taimi o aso o tatou laiti. Suiga o le olaga. Aua tou te fefefe i suiga. O le fautuaga lena a lou sui usufono. E le iloa pe sui atu le mea lea sao uma mai ai outou, ae oti ai matou, aua o suiga na sa fai foi e lena itu ina ia sao outou ae oti matou a o le a le mea na tupu? Na faiaina leaga lava le HRPP i suiga na.

O le ala lea o lou tulai atu malie ia fautua i mea lelei ae aua le fautua i mea ua atili ai ona sese le Tulafono. E iti a nai mea e 2 ia e taumafai atu, a uma ma lelei o le fautuaga lena. O lou tulai atu lena ina ia faafoia faafitauli ne i aafia ni mafaufau ona tele lea o le tatou... ae faamalie atu i le sui usufono, o le manaia ia o le lauga a le sui usufono ae na ona ou faamanatu suiga e tele lea sa fai mai i le tatou taufetuliga aemaise le soifuaga. O le olaga lava ia o le suiga. Faafetai. Ia manuia le tatou fonu.

FOFOGA FETALAI: Lau Afioga i le sui usufono mamalu, ua tele nei fautuaga ua avatu i lau Afioga i le sui usufono mamalu.

Afioga LEAANA RONNIE POSINI: Lau Afioga i le Fofoga Fetalai o lea ua maitau uma lava saunoaga ia, e pei e tau ese mamao lava isi mea ia ou te talanoa atu i ai ma mea lea e taumafai atu ai. O le taumafai atu lea leaga o lena itu o lea na folafolaina a tulai mai e toe vaevae Itumalo. O le uiga o lau tala, a oso la e resitala ae le vaevae muamua Itumalo? Vaevae Itumalo ona resitala sao loa lea i ai. O le mea tonu lena.

FOFOGA FETALAI: O lea ua uma ona saunoa le... ae se i tulai mai lau Afioga i le Minisita.

Susuga Hon Laauli Leuatea Polataivao Fosi: Leaana e leai se matou tautinoga e toe fai se vaeveaga. E tasi a le tautinoga sa fai faafoi le tofi o Saleaula, o upu na na tautino ma le Palota mai o tagata mai fafo. O itu tetele na na matou tauavea, a o se upu i se toe vaeveaga o lea ua saunoa le Minisita a o le a le mea na fai? Lea na fai le Commission of Enquiry lea e sau ai le latou fautuaga lea e iloilo i le taimi lenei i le Kapeneta. O lea la e tuualalo atu pea taatia mai, taatia mai o lea e soalaupule i le taimi lenei ia ma faasolosolo atu i tulaga masani. Ma le agaga faaaloalo.

FOFOGA FETALAI: E i ai le manatu lau Afioga i le...

Ia se i tulai mai lau Afioga i le Sui Fofoga Fetalai. Malie le sui usufono mamalu.

Afioga Auuapaau Mulipola Aloitafua Mulipola: Sa leai lava se manatu e faalavelave i le lauga a Safata, ae ona ua maua atu lava i le faalogo le saunoaga o lo o faapea mai i se tuualalo a le Malo e vaevae Itumalo. O lau fesili, ua aumai se Tulafono Tau Faaofi e vaevae Itumalo? Leaga o au o le Taitaifono o lea ou te faatali i le Lipoti na ave i le Kapeneta ma le Pulega a le Malo, a o lea lava ou te maua atu. Ia ou te fesili tuusao atu la, ua aumai se Tulafono e vaevae ai Itumalo aua o au le isi tagata na ou manao e vaevae lou Itumalo? Ma le agaga faaaloalo.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: O lea lava e manino e leai se Tulafono. E leai se Tulafono o faaofi mai e toe fetuunai ai tuaoi o tatou Itumalo. E pau lava le mea lea e manino lea na saunoa le Minisita o Faatoaga o le a toe faafoi le tofi o Saleaula. O lea la ou te fia fesili i le sui usufono lea e saunoa, a faafoi la le tofi o Saleaula e aafia ai la le resitala ma le mea lea e te saunoa ai ma atugalua ai lou finagalo? Aua e pei e ese la le Itumalo lela ese Safata lea e te tulai mai ai, o le sao lea?

FOFOGA FETALAI: Ou te fautuaina le sui usufono e leai se mea o le a e tali ai fua i le fesili, o le tulaga lava ia e pei foi lava o le fesili a Anoamaa 1 oi a Vaimauga 1, la a toso ai lau Afioga i le sui usufono mamalu i na mea. A o le mea ia, o le tatou Tulafono Tau Faaofi lea e talanoaina. O le isi mea o lea ua saunoa manino Minisita o le Kapeneta i le fuafuaga lea ona o le fautuaga a le Komisi ma le Komiti Faalepalemene e pei ona... ia lea e galulue ai le Kapeneta i le taimi lenei. Ia, o se fesoasoani atu lena ua maea lou taimi.

Afioga LEAANA RONNIE POSINI: Lau Afioga i le Fofoga Fetalai leai o lea ua saunoa le Minisita o le Ofisa o Faatoaga. E tatau foi la ona ou tali faamalamalama i ai. E matua aafia lava le matou Itumalo i le resitala lea. O

lona uiga e toe fai foi le isi galuega e resitala, e ese le resitala lea o le a fai, a toe fetuunai foi, e toe fai foi le isi resitala. Ae o lau vaai i le Tulafono lea e tau aumai nei lea ua faaosoa faaogatonu mai, vaeatu lava lau Afioga i le Fofoga Fetalai ma le mamalu, e pei ua tau muamua mai le taavale solofanua ae mulimuli mai tua le solofanua.

Susuga Hon Laauli Leuatea Polataivao Fosi: Lau Afioga i le Fofoga Fetalai, ioe se malie ia le Aiga Malosi, malie ia o na e te malamalama ae e te le o fia malamalama. Tatou o, e i ai aiaiga e fai ai vaega na e faafoi ai isi mea e tatau ona faafoi i ai. Don't worry and don't stress.

FOFOGA FETALAI: Ia ua i ai foi le manatu o le Nofoa ua tatau foi ona faamuta le tatou felafolafoaiga. O lea lava sa tuu atu le avanoa i lau Afioga i le sui usufono mamalu, o lea foi sa tuu atu le avanoa i Afioga i Minisita. Ou te talitonu o le tofa a le sui usufono mamalu le isi tofa e ese lou fia faalogologo i ai, ioe, e loloto foi ae i ai ma isi mea i tua atu o na saunoaga.

O le mea lea, ou te faamalulu atu i le sui usufono mamalu, ia vagana o lea ua ou fai atu o lea ua faamuta le... Ia faamaea maia e faigata foi le... Faafetai.

Afioga LEAANA RONNIE POSINI: Lau Afioga i le Fofoga Fetalai ou te ava tele ma usitai atu i lau Afioga, o le a uma foi le manatu o lenei Itumalo. E faamalulu foi po o lea se tala ae faapena le tatou Palemene, e tatou tatala le tofa ma faautaga leaga a [.....] le tatou Tulafono lenei o ai e tuuaia? E tuuaia lava tatou e le tuuaia na o le Minisita o le Ofisa o Faatoaga, e tuuaia uma lava le Palemene ma le Taitai o le Malo. Manuia tele lau Afioga i le Fofoga Fetalai manuia le fonu a Samoa.

FOFOGA FETALAI: Ia tulai mai lau Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, manaia a le lauga a le sui usufono lea ae ua toe faamataga lava i lafoga mulimuli o le palalu e pei o la e palauvale se i tulou le Maota. Ae a pe a aveese upu ia e le o se upu Samoa, ae fautua atu i le sui usufono, o lea ou te vaai atu e pei e gasegase le sui usufono ae le maua se fualaaui e cure ai lona... o le mea lea e pei e ala ai ona ou popole.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai pe maua se avanoa i le Tulafono Tumau.

FOFOGA FETALAI: O lea... i le Tulafono Tumau.

Afioga LEAANA RONNIE POSINI: Faaua atu ia sa matou tala lau Afioga i le Fofoga Fetalai, ne i te i ua aveseina le upu palalu a o le a se isi mea ne i te i ua faaletonu le tatou Tulafono leaga o lea ou te vaai atu i le Minisita o Soifua Maloloina ou te le iloa po o le mea la e pupula sao mai ia a'u po o le

mea o la e faatafa i se isi itu. Leaga o lea la e te taua e pei ou te mai, ae pei a o lea e te gasegase. Ma le agaga faaaloalo.

FOFOGA FETALAI: Ua i ai le manatu o le Nofoa e talitonu foi o uiga lava ia o le tatou Maota, ae avatu faafautuaga foi e le Nofoa tautuana a tatou saunoaga ma upu e felafoai foi i totonu o le tatou Maota. O le mea lea e faatonu ai le Failautusi ina ia tuueseina le saunoaga mulimuli lea a le sui usufono mamalu mai Safata le upu lea atonu e le logo lelei foi i le faafogafoga aemaise foi o faamaumauga a le tatou Palemene.

Upu na faatonuina e le Fofoga Fetalai e aveese mai Faamaumauga o le Saunoaga a le Sui Usufono mo Safata 1: “[*Palalū*].”

Ua i ai le manatu ua lava foi lea galuega mo lenei aso, e talitonu foi ua faaaaogagase le tatou Maota i le tatou galuega o le mea lea ua maitau atu tatou sailiili malosi ia mo le aso a taeao. E avatu a le faamalo ma le faafetai a le Nofoa i le paia o le tatou Maota o ē sa sausaunoa i lenei aso. Talu ai ona o lea ua tatou taunuu mai toetoe lava tatou taunuu i le tatou taimi manava, ua ou manatu ia o lo o avanoa le aso taeao se i saili malosi le paia o le Palemene aua lava le tatou galuega. Faafetai mo tuleiga ma saunoaga mo lenei aso, faafetai mo lo outou sao taua e matimati ai le tatou Tulafono, malo le faatoatoa, malo foi le onosai i le paia o le tatou Palemene. Talosia ia i le alofa o le Atua i le aso a taeao e toe faaaau ai le tatou galuega. Faafetai atu i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, o outou lava o tua atu i ai le Malo ma le Palemene. Malo le tautua Malo faamanuia le Atua i lo outou valaauina.

E le faagaloina le tapuaiga a Samoa i ona tafa e fia malo faafetai tatalo, o lea ua iu manuia le alofaiva o le Palemene i lenei aso ona o lau tapuaiga malo faafetai. Faamanuia pea le Atua i si o tatou atunuu.

Ae tatou te le i tolopo ou te talosaga atu i le sui usufono mo Lefaga ma Faleseela se i saunia se tatou tatalo e faaiu ai le tatou fono.

Na tolopo Taualumaga a le Fono Aoaofaitulafono i le itula e 1:01 i le aoauli seia aulia le Aso Tofi, 07 Mati 2024 i le itula e 9:30 i le taeao.